

An u axi thuchanchat an ebchalabchic ti Roma c'al an t'ocat abathuale Pablo

**A Pablo in thuchanchal an
tamcunel ebchalab ti Roma**

1 Nana'its im Pablo tin t'ojnalil a Jesucristo ani jaye tin abathualejil, cum jats tim bijiyamal a Dios. Tin tacuyamal a Dios abal cu olnanchichic an inic an alhua' cau.

²Pel i cau axi ma tam ti biyalits a Dios im bijith ulumalits ne'ets quim bina'. Jats xe' axi q'uejab olna c'al in caulomejilchic ani ti al an T'ocat Thuchlab. ³Ani xo' ti al an alhua' cau tats tu olnab i Ajatic Jesucristo axi pel in lej Tsacamil a Dios. Tin cuenta in anam t'u'ul pel i at xits'lab c'al an ts'ale David. ⁴Tin cuenta in t'ocat pel in lej Tsacamil a Dios, ani tam ti ejtha ti al an jolimtalab ma tamits tu tejhua'mel abal in lej cua'al in c'athpich tsap. ⁵Tin ebal jaja' i bats'uhual in alhua' inicthal a Dios abal qui olnanchi im bij a Jesucristo tim patal am bichouchic. Quim belchi im bij ani quim putu c'al jahua' jaja' in ulal. ⁶Hua'ats tata'chic a belchamal im bij, ani jaxtam a Dios ti tsu'tal pel ti c'al a Jesucristo.

⁷Nan tu thuchanchal axe' xi u patal tata'chic ax it c'uajat ti bichou

Roma. A Dios ti c'anithal ani ti tacuyamal abal quit t'ocat xe'tsin junax c'al jaja'. U lej le' abal i Tata Dios ani i Ajatic Jesucristo ti lubach co'onchi a ichich c'al in alhua' inicthal ani ti jun ejetbethanchi a ichich.

**A Pablo in le' ti tsa'bix
c'al axi ti Roma**

⁸C'a'al u le' tu ucha'chic abal u binal i c'ac'namal yan c'al a Dios tim bij a Jesucristo, cum patal tata'chic tim puhuel an tsabal it t'ilnal abal a belal a Cristo. ⁹A Dios in lej tso'ob abal ets'ey nan tu conchinchal i alhua'talab c'al jaja' tam in ol. C'al patal u ichich u t'ojonchal a Dios ani u olnanchal im bij a Jesucristo in Tsacamil a Dios. ¹⁰Ets'ey u conchal a Dios an q'uij abal max cu ejtou quin c'ale tu tsa'biy chic. Lequitsq'ui max pel in culbetai quin c'ale. ¹¹U lej le' tu tsu'u ani tu exobchiye jant'ots tam pithoblab an Espíritu Santo in le' ti pitha'chic abal más ca lej junini' bela' a Cristo. ¹²Taye cu junat tsaplíxín jun c'al xi jun, cum junax i belal a Cristo.

¹³Ebchalabchic, u le' abal ca tso'obna' abal yan i calel u

tsalpayamalits quin c'ale c'al tata'chic ani yabaye u ejtohuamal quin c'ale. U le' tu tolmiythic abal ca más tabatnanchi in cahuintal a Dios jant'ini' tin tabatnanchamalits axi q'ue'atchic. ¹⁴U cua'al u uchbil cu olnanchi in cahuintal c'al tim patal an inicchic, axi ti al am pactha' bichouchic ani jaye axi ti al an alte' q'uimathchic. Cu olchi axi tsalpathchic ani jaye axi yab tsalpath. ¹⁵Ma ju'tam huichat cu ejtou, in lej canat abal tu olnanchichicte an alhua' cau ax it c'uajlchic ti Roma.

In tsap an alhua' cau

¹⁶Yab u tithenal an alhua' cau cu olna' cum tats ti c'ujat in tsap a Dios, ani c'al patal jitats quim bela' ne'ets ca jec'ontha c'al in hualab. In le'namal a Dios abal ca oc'ox olnanchat an alhua' cau an Israelchic ani talbel axi yab Israel. ¹⁷Jats c'al an alhua' cau a Dios tu tso'obliyalchic jant'ini' tucu tsu'u huahua' tu bolith c'al jaja'. Antsana' tu tsu'tal a Dios expith max qui bela' an alhua' cau. In ulal an T'ocat Thuchlab abal jitats tsu'tatits ti bolith c'al a Dios cum im belalits, ja'its jaja' axi it ejatlith abal ets'ey.

Jolbith an inicchic

¹⁸I tso'ob abal a Dios ti eb in lej yajchiquiyal patal an inicchic axi yab pututh ani axi c'al im pojcaxtal yab in hualcal ca exla an chubaxtalab. ¹⁹Ma ju'tam huichat u ejtohuab ca exla a Dios, antsana' in ejtohual an inicchic quin exla' a Dios cum in tejhua'metha'its in ey. ²⁰Aba ani' yab u tsu'tab

a Dios, bel in tejhua'metal in ey c'al in ts'ejcabil. Ma tam tin ts'ejca' an tsabal ani an eb in tajax tejhua'metha' abal chubax pel a Dios ani in cua'al in tsap abal ets'ey. Jaxtam an inicchic yab in ejtohual quin huaynanchi jant'o max yab in exlal a Dios. ²¹Ma tam ti c'a'al in exlamal a Dios, tocat yab in chubax c'ac'na' ti Dios ani yab im bina' i c'ac'namal yan c'al a Dios. Talbel tocat in q'uibts'oth tsalpanchi in ey a Dios, ani yabats in exla' cum macu'bejits in tsalap. ²²Macu'benequits in tsalap aba ani' in uluchic abal tsalpath. ²³In jila'chic ti c'ac'nax c'al a Dios axi ets'ey ts'alat ani ni jayq'ui' yab u tsemel, ani in c'ac'na' i thulcuts axi inquith ejtil i inic ax in ey u tsemel. In diosna' i thulcuts axi ejtil i ts'itsin ani i tsan ani i tse' acan.

²⁴Jaxtam a Dios in jila' an inicchic ca cuete' quithabme tin ebal in quithab le'nomtal. Quin t'aja' yan i t'ajbilab tin anam t'u'l axi lej tithetal. ²⁵Yabats im belchi an chubaxtalab tin cuenta a Dios, tocat im bela' i janamtalab. Tocat in c'ac'na'chic ani im palenchi in ts'ejcabil a Dios, ani yabats im palenchi a Dios axi expith in tomnal ca puhuethanchat im bij abal ets'ey. Amén.

²⁶Jaxtam a Dios in jila' an inic quin t'aja' in cuete' titheatal le'nomtal. Ma i uxumchic in hualba' in t'ajtal ey ani co'óxin c'al in at uxum. ²⁷Aniye jaye i inicchic in hualba' in t'ajtal ey ani co'óxin c'al in at inic. Huat'ath le'náxin i inic c'al in at inic ani yab c'al i uxum. In t'aja' i titheatal t'ajbilab tin inictal

c'al in at inic. Jaxtam a Dios in jila' quin leca' i yajchictalab tin ebal in quithab t'ajbil.

²⁸Cum yabats in le'na' an inicchic quin c'ac'na' a Dios tin Diosil, jaxtam a Dios in jila' ca quithabme in tsalap. Quin t'aja' i titheatal t'ajbilab axi yab in tomnal quin t'aja'. ²⁹Xe'etsac in t'aja'chic hualim jahua' yab bolith. Pel i uxumbe ani i inicbe. Pojcxachic. Pel i jaylom c'al jahua' pel in c'al q'ue'at i inicchic. Pel i othnaxma'. Pa'ixnom ani tsemthom c'al in at inic. Pejéx c'al in at inic ani quithab t'ajchix. C'ambibma' ani t'uchixma' c'al i cau. ³⁰Quithab cahuilix. Im pojcal a Dios. Pel i c'uiyath tsalpanchix c'al in at inic. In c'athatnal tim ba' ani inic t'ajathchic tim ba'. Xe'ets tocat tsalpopol quin t'aja' más jahua' quithab. Jec'omchic c'al in tata ani c'al in mim. ³¹Macu'chic in tsalap. Yab im putuhual c'al jahua' in ulal ne'ets quin t'aja'. Yab c'anithom. Yab in ujnam ti paculanchix ani yab let'enthom c'al in at inic. ³²In tequeth tso'obits nixe' xi inicchic jahua' in ulumalits a Dios tin cuenta an hualabtalab, abal jitats quin t'aja' nixe' xi hualabtalab in tomnal ca tsemets. Aba ani' in tso'obits, bel xe'ets t'ajpipil c'al an hualabtalab. Ma u culbelchic max tam quin t'aja' xi q'ue'at an inicchic jayetseq'ui.

A Dios pel i bolith
ts'ejcom c'al an inic

2 Hua'ats jita' c'al tata'chic in jolbiyal in at inic tam ca hualbin, ani u hualbinal jayetseq'ui jaja'. Jitats antsana' jolbix c'al in

at inic, in mac'uchith jolbiyal tim ba' jaye. Yab ne'ets quin jec'a' ca yajchiquiyat c'al a Dios. ²I tso'obits abal a Dios ets'ey in t'ajal bolith tam quin yajchiquiy jitats quin t'aja' yab alhua'. ³Yab ne'ets quin jec'a' an yajchiquixtalab jitats quin jolbiy i hualbith inic ani jaja' jaye ca hualbin. ⁴Hualam yab in tequeth exlanchal in huinat alhua' inicthal a Dios, c'al ti c'aya'nab ani ti aychab ca jic'tson c'al in hualab. ⁵Cum lej t'ujbath in ichich ani yab u jic'tsonal c'al in hualab, jaxtam a Dios ne'ets quin yanethanchi i yajchictalab tam quim baju a q'uiucha ne'ets quin ts'ejca'. Tam ojni' ne'ets ca tejhua'me abal a Dios pel i bolith ts'ejcom c'al an inic. ⁶Ne'ets quin jalbinchi ti junchic jant'inits tin t'ajamalits max alhua' o max yab alhua'. ⁷A Dios ne'ets quin it ejatliy abal ets'ey jaja'chic ax in le' ca c'uajiy tin ts'alat c'uajattal ani quin co'oy jahua' hua'ats ti eb axi ni jayq'ui' yab ne'ets ca taley. Jats jaja'chic ax in junini' t'ajal jahua' alhua'. ⁸Ne'ets quin leca' in tsacultal a Dios ani ne'ets ca yajchiquiyat jitats quin t'aja' expith in cuete' culbeta. Yab in t'ajal jahua' in ulal an chubaxtalab, tocat in t'ayat t'ajal jahua' yab alhua'. ⁹Patal jitats in t'ajamal jahua' yab alhua', jats ne'ets ca yajchiquiyat c'al a Dios. An Israelchic ne'ets ca oc'ox yajchiquiyat ani talbel axi yab Israel. ¹⁰Patal jitats in t'ajamal jahua' alhua' ne'ets ca c'uajiy tin ts'alat c'uajattal a Dios ani ca puhuethanchat in ey ti eb. Ne'ets quin ats'a' jun ejetbethanchithits in ichich c'al a Dios. Antsana' ne'ets

quin oc'ox baju i Israelchic ani talbel quim baju axi yab Israel.

¹¹A Dios yab im poc'oth tsu'tal an inicchic. ¹²In yajchiquiyal jahuaquits tam inic axi hualbinenec. Aba anaquits yab in exlal an ts'ejcath cau axi binath c'al a Moisés, bel ne'ets ca yajchiquiyat c'al a Dios max hualbinenec. Aba anaquits in exlamal ani hualbinenec, bel ne'ets ca yajchiquiyat. A Dios ne'ets quin eyentha' an ts'ejcath cau tam quin ts'ejca' ax in exlamalits an ts'ejcath cau. ¹³Jita' tocat in ats'alq'ui an ts'ejcath cau yab ja axi tsu'tat ti bolith c'al a Dios. Jitats quin t'aja' jahua' in ulal jats axi tsu'tat ti bolith. ¹⁴Hua'ats axi yab Israelchic in t'ajal alhua' jant'ini' in ulal an ts'ejcath cau an inicchic quin t'aja'. Antsana' tin t'ajal aba i yab in exlal an ts'ejcath cau. Max antsana' tin t'ajal alhua', ejtil max in cua'alchic thuchath tin ichich an ts'ejcath cau. ¹⁵Antsana' ti tso'obnab abal jahua' in ulal an thuchath ts'ejcath cau, jayetseq'ui c'uajat tin ichich i inicchic axi yab Israel. U taunab c'al in cuete' ichich, junchiquil in ats'al jolbith ani junchiquil in ats'al bajuth c'al in t'ajbilchic. ¹⁶Ma ne'ets ca t'ajchin ti cuenta in tsinat tsalap an inic tam quim baju an q'uicha ca ts'ejca. A Dios ne'ets quim punu a Jesucristo ti ts'ejcom jant'ini' nan tu ucha'chic tam nan tu exobchi in cahuinal a Dios.

An Israelchic ani an ts'ejcath cau binath c'al a Moisés

¹⁷Hua'ats jita' c'al tata'chic in ulal abal pel i Israel ani in

thacatnal an ts'ejcath cau axi binath c'al a Moisés. In c'athat t'ajal cum exlomcua' c'al a Dios. ¹⁸In exlanchalcua' in culbetal a Dios ani in tso'obits jahua' c'athpich alhua' c'al a Dios, cum antsana' tu exobchinal c'al an thuchath ts'ejcath cau. ¹⁹In tsalpayal abal in ejtohual quin exobchixnanchi in tequeth belil a Dios axi ejtil i joc'tsi. In tsalpayal in ejtohual quin tajbanchi im belil axi xe'ets al an yic'uax. ²⁰Pel i ts'alabchixcua' c'al axi yab in exlal an chubaxtalab ani pel i exobchix c'al axi yabaye in ejtiyamal in cahuinal a Dios. In tsalpayal abal ti al an thuchath ts'ejcath cau binath c'al a Moisés tats ti c'uajat an lej exlomtalab ani an lej chubaxtalab. ²¹In exobchal q'ue'atchic, ani yab in exobchal tim ba'. In uchalchic yab alhua' ca cue'en, ani ja'its jaja' an cue'. ²²In ulal abal yab alhua' ca uxumbejin, ani pel i uxumbe. Im pojcal an thulcuts ax u diosnab, ani jun t'ajat in cue'enhal jahua' hua'ats ti al an tiyopan tin cuenta an c'ac'naxtalab c'al nix xi thulcuts. ²³In c'athatnal an thuchath ts'ejcath cau binath c'al a Moisés, ani yab im putuhual c'al jahua' in ulal. Antsana' in tejhua'metal abal yab chubax in c'ac'nal a Dios. ²⁴Jats nixe' an inic axi thuchathits ti al an T'ocat Thuchlab jun tin ulal abal u quithab cahuiliyab a Dios c'al axi yab Israelchic tin ebal in t'ajbil yab alhua' nixe' xi inic.

²⁵Ma tam ti biyal cojchinal in inicthal axi inic ti Israel abal ca tejhua'me pel in c'al a Dios. Xo' tabat max ca cojchin in inicthal an

Israel ani jaye quim putu c'al an uchbixtalab axi ti al an ts'ejcath cau binath c'al a Moisés. Jolat ca cojchin max yab im putuhual. ²⁶Hua'ats axi yab Israelchic yab cojchinene in inical, ani bel im putuhual c'al jahua' in ulal an ts'ejcath cau, ani a Dios in tsu'tal ejtil max cojchinenequits ani pelits tin c'al jaja'. ²⁷Antsana' tim putuhual aba ma i yab cojchinene in inical. Ani u jilc'onal jolbith an Israelchic max expith cojchinene in inical ani yab quim putu c'al jahua' in ulal an ts'ejcath cau. ²⁸Axi expith hua'tsinene pel i Israel yab ja ax in lej c'al a Dios, ani axi expith cojchinenequits tin inical yab ja ax in lej c'al a Dios. ²⁹Pel i lej Israel ani pelits in lej c'al a Dios jitats im binamalits in ichich c'al jaja'. Yab im bajuhual tin c'al a Dios tin ebal i thuchath uchbixtalab quim putu. Im bajuhual tin ebal an Espíritu Santo tin ichich. Ja'its nixe' xi inic u tsu'tab ti alhua' c'al a Dios aba i hualam yab ca tsu'tat ti alhua' c'al in at inic.

3 ¿Jant'o tam tabattalab max i inic pel i Israel? ¿Jant'o ti tabat max ca cojchin in inical? ²Ojni' lej tabat, cum a Dios im pitha' an Israelchic in thuchath cahuinalt. ³Max jita' c'al jaja' chic yab im putumal c'al in cahuinalt a Dios, yab qui tsalpay abal a Dios jaye yab im putuhual c'al jahua' in ulumalits ne'ets quin t'aja'. ⁴Ni abal jay iba qui tsalpay antsana'. Aba ma tim patal an inicchic max ca janamcahuin, a Dios iba. Ets'ey pel i lej chubax inic. Thuchathits a Dios ti al an T'ocat Thuchlab antse':

Aba ma an inicchic ti tsalpanchal yab chubax a t'ajal jahua' a ulal ne'ets ca t'aja', bel chubax ets'ey a t'ajal. Aba ma ti tsalpanchalac yab it pututh, bel lej chubax it pututh.

⁵¿Jant'iní' ti qui toc'tsiy max i inic quin ulu abal tam cu hualbin, tamna' a Dios más in ejtohual quin tejhua'metha' tim ba' ti pututh? Max chubax anac, tamna' a Dios yab in t'ajal pututh tam tu yajchiquiyal tin ebal i hualab. U ulalq'ui antsana' cum hua'ats i inic axi antsana' in tsalpayalq'ui. ⁶Ni abal jay iba qui ulu antsana' abal a Dios yab pututh. Max yabac pututh yab in ejtohualac ti pututh ts'ejcom c'al an inicchic.

⁷Auxe' max más u tejhua'mel ti chubax a Dios max huahua' cu janamcahuin. Max chubax anac, tam yab ne'ets quin tsu'tat tin hualbith inic c'al a Dios tam quin janamcahuin. ⁸Max chubax u tejhua'mel ti alhua' a Dios tam qui t'aja' jahua' yab alhua', tam in tomnal qui t'aja' jahua' yab alhua'. Hua'ats jita'chic tu quithab cahuiliyal, cum in ulal abal antsana' i exobchamalits. In tomnal ca t'ajat jolbiyat c'al a Dios jitats quin ulu ani'.

Patal huahua' u hualbith

⁹Auxe' max qui tsalpay abal huahua' tu Israel u lej alhua' ani axi yab Israel lejat yab alhua'. Ni abal jay iba qui tsalpay antsana'. I ulumalits abal a Dios in tsu'tal tim patal an inicchic jolbith tin ebal an hualab, axi Israelchic ani axi yab

Israelchic. ¹⁰Tu thuchathits huahua' ti al an T'ocat Thuchlab. In ulal:
 Ni jita' yab hua'ats ax in t'ajal
 alhua', ma juncats yab hua'ats.

¹¹ Ni jita' yab hua'ats ax in lej
 ejtinchal in tsalap a Dios. Yab
 hua'ats ax u alim c'al a Dios.

¹² Pilme tim fatal an inicchic yab
 in aynanchal im belil a Dios.
 T'ajat q'uibenequits.
 Yab hua'ats i alhua' inic, ma ni
 juncats yab hua'ats.

¹³ Caxiy in cahuinal an inicchic
 ejtil i tsemelom axi pet'elits
 in caxiy tam yabaye jolith.
 Lej c'ambix an inicchic c'al
 jahuats quin ulu.
 An cau jahua' in ulal ejtil in
 it'ixtal an tsan.

¹⁴ In caunal hualim i quithab cau
 ani i ts'a'ic cau.

¹⁵ Athithil ne'ets abal ti tsemthom
 c'al in at inic.

¹⁶ Xe'et ti q'uibethom ani ti othnax.

¹⁷ Yab in ujnam ca c'ujalelen jun
 ejet.

¹⁸ Ma ni hue' yab jic'tsoth c'al a
 Dios.

¹⁹ I tso'obits abal uchbith an
 Israelchic c'al an ts'ejcath cau
 jahua' a Dios im bina' c'al a Moisés,
 ani fatal jolbithits cum yab in
 ejtohual quin tala' putu c'al nixe'
 xi cau. Ni jun yab in ejtohual quin
 ucha' a Dios abal yab jolbith. Quin
 exbay tim fatal abal jolbithits.

²⁰ Ni jita' tam inic yab ne'ets ca
 tsu'tat ti bolith c'al a Dios expith
 max quim putu c'al an ts'ejcath
 cau binath c'al a Moisés. In ey an
 ts'ejcath cau pelits expith abal tucu
 tso'obliy abal pelits huahua' tu
 hualbith inic.

U tsu'tab ti bolith an inic c'al a
 Dios tam quim bela' a Cristo

²¹ A Moisés ani axi q'ue'at in
 caulomejilchic a Dios in olnamalits
 tin thuchath uhuil jant'ini' tucu
 tsu'tat tu bolith c'al a Dios. Xohue' i
 lej alhua' tso'obits jant'ini', abal yab
 ja tin ebal an ts'ejcath cau. ²²Tocat
 qui bela' a Jesucristo, ani fatal
 jitats quim bela' ne'ets ca tsu'tat ti
 bolith c'al a Dios. Max pel i Israel
 ani max yab pel i Israel, expith
 quim bela'. ²³Cum fatal huahua'
 u hualbinenequits, jaxtam yab i
 bajuhual cu tsu'tat tu bolith c'al a
 Dios. ²⁴Bel a Dios in ejtohual tucu
 ts'u tu bolith tin ebal in alhua'
 inictal ani tin ebal abal a Cristo
 Jesús tu jalc'uth calchiyamalits
 c'al i hualab tam ti tsemets al an
 cruz. ²⁵A Dios im bina' a Cristo
 ca tsemets ti al an cruz abal tucu
 jalbinchi i hualab c'al in huac'lath
 xits'al, ani i tabatnanchal in xits'al
 a Cristo tam qui bela'its. Ma
 jalbinchatits jaye in hualab an
 inicchic axi biyal tsemenecchic, ani
 jaxtam a Dios c'al in c'aya'tal im
 paculanchi in hualab jaja'chic jaye.
 Antsana' a Dios in tso'oblinchichic
 abal pel i alhua' inic. ²⁶Ani xo' bel
 tu tso'oblinchahue abal pel i alhua'
 inic, cum tu tsu'tal tu bolith tam
 qui bela' a Jesús.

²⁷ Max antsana' tu tsu'tatits tu
 bolith c'al a Dios cum i belalits a
 Cristo, jaxtam yab qui c'athatna'
 ti ba'. Yabats hua'ats jale' qui
 c'athatna' ti ba' cum expith i belal a
 Cristo, ani yab u tsu'tatits tu bolith
 tin ebal abal i t'ajamal jahua' in
 ulal an ts'ejcath cau. ²⁸I tso'obits

abal tocat qui bela' a Cristo
ani a Dios tu tsu'talits tu bolith
tamna'. Yab ja tu tsu'tal tu bolith
a Dios max expith qui putu c'al an
ts'ejcath cau binath c'al a Moisés.

²⁹Auxe' max a Dios pel in Diosil
an Israelchic expith ani yab pel in
Diosil jaye axi yab Israelchic. Pel
in Diosil jaye axi yab Israelchic.

³⁰Cum juncats a Dios hua'ats c'al
patal an inicchic, jaxtam in tsu'tal
ti bolith jitaquitsq'ui quim bela' a
Cristo. Yab jant'o ti exbath max pel
i Israel ani max ca cojchin in inictal
ani max yab pel i Israel ani max
ca cojchin in inictal. ³¹Auxe' max
i jolatmethal an ts'ejcath cau cum
i belal a Cristo. Abal jay iba. Max i
belal a Cristo, más ne'ets qui putu
c'al an ts'ejcath cau.

A Abraham pel i t'ipchixtalab

4 Nan u le' tu t'iloxnanchichic i
biyal at juntal xits'al Abraham.
²Max anac tsu'ume ti bolith c'al
a Dios tin ebal in t'ajbil, tam in
ejtohuamalac quin c'athatna' in
t'ajbil tin tamet a Dios. Cum yab ja
ti tsu'ume ti bolith, jaxtam yab in
ejtou. ³Thuchathits a Abraham ti al
an T'ocat Thuchlab abal im bela' a
Dios, ani jaxtam ti tsu'ume ti bolith
c'al a Dios. ⁴Max i inic ca t'ojon ani
ca jalbinchat yab pel i pithoblab,
pel in atohual. ⁵Yab pel in atohual
tam an inic ca tsu'tat ti bolith c'al a
Dios. Yab u tsu'tab ti bolith tin ebal
in t'ajbil, tocat quim bela' ani ne'ets
ca tsu'tat ti bolith aba ani' pel i
hualbith inic. ⁶A David in olna' jaye
abal yab tin ebal in t'ajbil an inic
ca tsu'tat ti bolith c'al a Dios, tocat
quim bela' ani ne'ets ca tsu'tat ti

bolith. Tam ojni' ne'ets ca culbe. ⁷In
ulu a David:

Ne'ets ca culbe jitats ca
paculanchat in hualab c'al a
Dios.

⁸Ne'ets ca culbe jitats yab ca
jolbiyat c'al an Ajatic tin ebal
in hualab.

⁹¿Antsana' ne'ets ca culbe
expith axi cojchinene in inictal
ani yab ne'ets ca culbe axi yab
cojchinene? Nan tu ucha'its
abal tsu'ume ti bolith a Abraham
cum im bela' a Dios. ¹⁰¿Tsu'ume
jaja' ti bolith c'al a Dios tam ti
cojchinenequits in inictal o tam
ti yabaye cojchineneac? Yabaye
cojchinenequits. ¹¹Cum im belamal
jats ti tsu'tatits ti bolith, ani ma ti
talbelits tam ti uchan c'al a Dios
ca cojchin in inictal abal antsana'
ca tso'obna pel in c'al a Dios. Im
baju a Abraham ca t'ajan ti cuenta
c'al a Dios ejtil max pel i tatalab
c'al patal jitats quim bela' a Dios.
Aba i ca cojchin in inictal, ne'ets
ca tsu'tat ti bolith an inicchic
c'al a Dios tam quim bela'its. ¹²A
Abraham pel ejtil i tatalab jaye c'al
axi cojchinene in inictal ani im
belal a Dios. Im belal jayetseq'ui
jant'ini' im bela' a Abraham tam ti
yabaye cojchinenequits in inictal.

Am bijchith cau u putnal tam ca belchin

¹³Bijchith uchan a Abraham c'al
a Dios abal jaja' ani in tsacamilchic
ne'ets ca pithan tim puhuel an
tsabal ti c'alab. Antsana' ti uchan
cum tsu'tatits ti bolith ma tam tim
bela'its a Dios, yab abal im putumal
c'al in uchbixtal a Dios. ¹⁴Auxe'

max ne'ets ca pithan jahua' bijchith uchan c'al a Dios expith max jita' quim putu c'al in uchbixtal a Dios. Iba. Max chubax anac, tamna' jolat qui belchi jahua' a Dios tu bijchith uchal ani yab jant'o in jalbil im bijchith cahuintal. ¹⁵In ey in uchbixtal a Dios tu jolbiyalthic tam yab qui putu. Cum hua'ats i uchbixtalab, hua'ats jant'o ca jec'omna.

¹⁶I belal a Dios ani tin ebal in alhua' inictal jaja' tu pithal jahua' im bijchith ulumalits ne'ets tucu pitha'. Lej chubax i bats'uhual max i belal ejtil im belamal a Abraham ani in at juntal xits'al jaja'. Nixe' xi bijchith cau yab expith pithan ca tabatnanchat c'al ax im putuhual c'al in uchbixtal a Dios, jaye ca tabatnanchat c'al ax im belal a Dios ejtil tim belamal jaye a Abraham. Antsana' a Abraham pel i tatalab c'al patal huahua' ax i belal. ¹⁷In ulal an T'ocat Thuchlab abal a Dios im bijiy a Abraham ti tatalab c'al yan i inicchic, cum im bela' a Dios. Jats a Dios ax in ejtohual quin ejtha' an tsemelomchic ani quin hua'tsintha' jahua' yabaye u hua'tsinenequits.

¹⁸A Abraham im bela' a Dios tam ti yab hua'ats i aychixtalab ne'ets ca lablinchat. Im bela' abal ne'ets ca bijiyat ti tatalab c'al yan i inicchic jant'ini' ti uchanits c'al a Dios. Ne'ets ca pithancua' yantalam i tsacamlab. ¹⁹Aba ma in cuáalits jat'hua' bo' inic i tamub, bel yab in jila' quim bela'. Jaye uxcue'its a Sara, ani yabats in ejtohual quin co'oychic i tsacam. ²⁰Ni jayq'ui' yab in tsalpay max a Dios yab

ne'ets quin ejtou quin t'ajchi jahua' bijchith uchnenequits ne'ets quin t'ajchi. In junini' bela' ani in junini' tsapna' a Dios, ani im puhuethanchi im bij a Dios. ²¹Lej thacat in ichich cum im bela' abal a Dios in huit'al quin t'aja' jahua' im bijchith ulumalits ne'ets quin t'aja'. ²²Cum in lej bela', jaxtam ti tsu'ume ti bolith c'al a Dios.

²³Abal tsu'ume ti bolith tam im bela', yab expith thuchat tin cuenta a Abraham. ²⁴Huahua'hue ne'ets cu tsu'tat tu bolith tam qui bela' a Dios ax in ejtha' i Ajatic Jesús ti al an jolimtalab. ²⁵Ja'its a Jesús axi bina ca tsemtha ti calchix c'al huahua' i hualab, ani xo' ejthachits abal cu tsu'tat tu bolith c'al a Dios.

Axi tsu'tatits ti bolith c'al a Dios

5 Cum i belal an Ajatic Jesucristo, jaxtam tu tsu'tatits tu bolith c'al a Dios, ani tin ebal jaja' jats tu c'uajatits jun ejet c'al a Dios. ²Cum i belal a Cristo, jaxtam tu utbamalits c'al a Dios ani u t'ayat co'oyab c'al in alhua' inictal a Dios. U lej culbel cum i aychal cu ne'tha ti eb cu c'uajiy tin ts'alat c'uajattal a Dios. ³Ani yab expith ja tu culbel. U culbel xo' jaye c'al an yajchictalab, cum jats c'al tu cuxuthmethanchab i ichich. ⁴Ani c'al i ichich cuxuthmethanchith jats tu tsu'tab tu alhua' c'al a Dios. Ani jaxtam más i aychal cu ne'tha ti eb cu c'uajiy c'al a Dios. ⁵Jats i aychal ani i lej tso'obits abal ne'ets cu ne'tha cum yab u c'ambix a Dios. I lej tso'obits abal lej c'anithom a Dios, cum tu pithamalits an Espíritu Santo abal tucu tso'oblinchi in c'anithomtal.

6Cum huahua' yab u tsapnel qui jec'ontha' ti ba' c'al an hualabtalab, jaxtam tim pejchith q'uiuchajil tsemets a Cristo ti al an cruz ti calchix c'al huahua' tu hualbith inic abal tucu jec'ontha'. **7**C'al huahua' tu inic aba ma pelac i alhua' inic axi ca calchiyat, yab lej hua'ats jita' ca tsemets ti calchix c'al jaja'. Lequitsq'ui max hua'ats tsab ox quim bina' tim ba' ca tsemets ti calchix max c'athpich alhua' axi ne'ets ca calchiyat. **8**Aba ani' antsana' c'al an inicchic, a Dios in tejhua'metha' abal tu c'anithal tam tim bina' a Cristo ca tsemets ti calchix c'al huahua' tu hualbith inic. **9**Cum tin ebal in huac'lath xits'al a Cristo tsu'tat huahua' tu bolith c'al a Dios, jaquitsq'ui más a Cristo ne'ets tucu jaluntha' yab qui leca' an yajchictalab axi a Dios quin abchi' an inicchic tam ca taley an q'uij q'uicha. **10**Tam ti huahua' pelac u tomolnax c'al a Dios, jaja' tu huichba' tu ja'ublab cum tsemets a Cristo ti calchix c'al huahua'. Cum pelits tu ja'ublab c'al a Dios, jaquitsq'ui más a Cristo ne'ets tucu jaluntha' c'al an hualabtalab cum ejthachits ani ejat abal ets'ey. **11**U culbel huahua' c'al a Dios, cum tin ebal i Ajatic Jesucristo jats tu huichbathits tu ja'ublab c'al a Dios.

A Adán ani a Cristo

12C'al juncats i inic Adán jats ti ts'i'quin an hualabtalab teje' tsabal, ani tin ebal an hualabtalab jats tu tsemel an inic. Cum patal hualbinenec, jaxtam patal u tsemel. **13**Hualbinenequits an inicchic tam ti yabaye hua'ats i ts'ejcath

cau quin lejquith bijiy jahua' pel i hualabtalab. **14**Aba ani' yabaye hua'atsac i ts'ejcath cau, bel atan ti lej jayq'ui' an inicchic c'al an tsemela cum hualbinenequits. Atan ma tam tin q'uiuchajil a Adán ani ma tam ti chich a Moisés ani pithan an ts'ejcath cau c'al a Dios. Aba i in ayquilchic a Adán yab in jec'omnamal in uchbixtal a Dios ejtil in jec'omna' a Adán, bel atan c'al an tsemela. A Adán in t'aja' abal ca tsemets an inicchic, ani a Cristo axi chich talbel in t'aja' abal ca ejatliyat abal ets'ey.

15Pil in hualab a Adán ani pil im pithbil a Dios. Tin ebal in hualab juncats i inic Adán, jats ti ts'ilc'oyat yantalam an inicchic c'al an hualabtalab ani c'al an tsemela, ani tin ebal im pithbil a Dios yantalam i inicchic u ts'ejhualith jec'onthab c'al an hualabtalab c'al juncats i inic Jesucristo. Lej c'athpich pulic im pithbil a Dios yab ejtil in hualab a Adán. **16**Pil in calat in hualab a Adán ani pil in calat im pithbil a Dios. C'al juncats in hualab a Adán hua'ats i jolbixtalab, ani c'al im pithbil a Dios u ejtohuab an inicchic ca tsu'tat ti bolith c'al a Dios aba ma yan i hualabtalab in t'ajamal. **17**Tin ebal in hualab juncats i inic Adán, jats tu atnal an inicchic c'al an tsemela. Tin ebal juncats i inic Jesucristo ani in alhua' inictial a Dios jats ti ejtohual qui ata' an hualabtalab ani an tsemela. Jats tu it ejatlith huahua' ani jats tu tsu'tatits tu bolith c'al a Dios.

18Cum ts'ilc'onenec tim patal an inicchic c'al in hualab xi juncats i inic Adán, jats ti jolbithchic c'al

a Dios. Tin ebal juncats i inic Jesucristo ax in t'ajchi in culbetaal a Dios, jats ca ejtohuat ca tsu'tat ti bolith ani ca it ejatliyat patal an inicchic c'al a Dios. ¹⁹C'al in jec'omtal juncats i inic Adán, jats ti tsu'tat yantalam i inicchic ti hualbinel. Cum juncats i inic Jesucristo in t'ajmal in uchbil c'al a Dios, jats ti ne'ets ca tsu'tat yantalam i inicchic ti bolith c'al a Dios.

²⁰A Dios im bina' an ts'ejcath cau abal ca tejhua'metha más in hualab an inic. Aba ma yantalam in hualab an inicchic, bel u atananchab c'al in alhua' inictal a Dios cum más in cu'a'l in tsap. ²¹Tin ebal in tsap an hualabtalab, jats tu atnal huahua' c'al an tsemla. Tin ebal in tsap in alhua' inictal a Dios chi'thachits c'al i Ajatic Jesucristo, jats tu it ejatlith abal ets'ey ani jats tu tsu'tatits tu bolith c'al a Dios.

Ejtil max u tsemthach i ey tin cuenta an hualabtalab ani u it ejatlith c'al a Cristo

6 Auxe' max qui ulu huana cu hualbin más abal a Dios tucu paculanchi más c'al in alhua' inictal. ²Ni abal jay iba. Cum a Dios tu tsu'tal ejtil max u tsemthachits i t'ajtal ey tin cuenta an hualabtalab, jaxtam yabats in tomnal cu hualbin. ³Qui tso'obna' abal ejtil max u tsemtsits junax c'al a Cristo Jesús ti al an cruz. U pujathits ani u ts'at'bathits c'al jaja'. ⁴Tam tu pujanits ejtil max u junax joliyamejits c'al a Cristo ani u tsemthachits i t'ajtal ey tin cuenta an hualabtalab. Ani jant'ini' ti ejtha

a Cristo al an jolimtalab c'al in huinat tsap in Tata ti eb, antsana' huahua' ejtil max u junax ejthachits c'al a Cristo. Jaxtam qui ayna' i it xe'tsintalab.

⁵Cum i ejtilnal a Cristo tin cuenta in tsemtal, jaye i ejtilnal tin cuenta in ejthachtal. ⁶I tso'ob abal i t'ajtal ey ejtil max junax tsemthach c'al a Cristo ti al an cruz abal yabats quin co'oy in tsap. Yabats cu huic'at co'oyat c'al i hualbith t'ajtal ey axi ejtil i amu ti jayq'ui' tu huic'at co'oyamal. ⁷An tsemelom yabats u abatnab c'al in tsap an hualabtalab. Antsana'hue. ⁸Max u junax tsemtsits huahua' c'al a Cristo, i lej belal abal u junax ejthachits jaye. ⁹I tso'obits abal ejtha a Cristo ti al an jolimtalab ani ni jayq'ui' yabats ne'ets ca tsemets junil, cum yabats ne'ets ca ejtohuat ca atan c'al an tsemla. ¹⁰Jun calat expith tsemets a Cristo tin cuenta an hualabtalab, ani xohue' ejatits c'uajat c'al a Dios in t'ajchale in culbetaal. ¹¹Antsana'chicte ca t'ajchi in culbetaal a Dios cum it ts'at'bathits c'al i Ajatic Cristo Jesús. Ca lej t'aja'chic ti cuenta abal ejtil max it tsemthach a ey tin cuenta an hualabtalab.

¹²Jaxtam yabats ca hualca' ta ba' ti ata' an hualabtalab. Yabats ca t'aja' jahua' in le' a cuete' inictal axi ne'ets ca taley. ¹³Ni hue' yabats ca bina' ta ba' quit eyentha c'al an hualabtalab, tocat ca bina' ta ba' tin c'ubac a Dios abal jaja' ti eyentha' ca t'aja' jahua' bolith. Ejtil max it tsemenevacan xo' it ejthachits. ¹⁴Cum it abatnabchic c'al in alhua' inictal a Dios ani yab c'al an

ts'ejcath cau, jaxtam an hualabtalab yabats in ejtohual ti ata'chic.

An c'unat t'oinal pel i t'ipchixtalab

15 Auxe' max cu hualbine cum u abatnab c'al in alhua' inicalt a Dios ani yab c'al an ts'ejcath cau binath c'al a Moisés. Ni abal jay yabats cu hualbin. **16** A tso'obchic abal max a binal ta ba' quit c'unat abatna c'al i amulab, pel a uchbil ca tala' t'ajchi patal jahua' ti uchbiyal. Max a binalchic ta ba' c'al an hualabtalab, ejtil max a amunal an hualabtalab. Ne'ets quit hualbine ani ne'ets quit tsemets abal ets'ey. Expith max a amunal a Dios, ne'ets ca t'aja'chic jahua' bolith. **17** Ti jayq'ui' it c'unat abatname c'al an hualabtalab, ani xo' itsots. C'ac'namal yan a Dios abal c'al jum putat a ichich a putuhual c'al in cahuintal a Dios ax it exobchinene. **18** A Dios ti hualcanthamalits abal yabats quit c'unat abatnachic c'al an hualabtalab, ani xo' it c'unat co'oyab c'al a Dios abal ca junini' t'aja' bolith. **19** Nan tu t'ipchixnanchalchic antsana' i amulab ani in abatnanelil cum quibat ca ejtiy an naptal chubaxtalab. Ti jayq'ui' a bina' ta ba'chic quit c'unat abatna c'al jahua' at'ax ani quithab, ani xohue' ca bina' ta ba' ca junini' t'aja'chic jahua' bolith ani expith jahua' t'ocat.

20 Tam it c'unat abatnamechic c'al an hualabtalab yab a t'ajamal jahua' bolith. **21** Yab jant'o ti tolminchichic an hualabtalab lejat, ani xo' tocat a tithenal jahua' a t'alamalits. In calat an hualabtalab pel i tsemla expith.

22 A Dios ti hualcanthamalits abal yabats quit c'unat abatna c'al an hualabtalab, ani xo' it c'unat co'oyab c'al a Dios abal ca junini' t'ajchi jahua' jaja' in le'. Xo' a ela'its i alhua'talab, cum a Dios ti t'oquethanchamalchic a ichich ani talbel ne'ets quit ets'ey c'uajiy c'al jaja'. **23** An hualabtalab tu jalbiyalchic c'al i tsemla, ani a Dios jats tu ts'ejhualith it ejatlinchal i ejattal abal ets'ey tam u ts'at'bathits c'al i Ajatic Cristo Jesús.

An t'ipchixtalab c'al axi tomquithchic

7 Ebchalabchic, a tso'ob abal expith jita' ejate, jats axi uchbith quim putu c'al an ts'ejcath cau axi c'al an oc'leccchic. **2** Jun i tomquith uxum in cua'al in uchbil quim putu c'al nixe' xi ts'ejcath cau ca junini' c'uajiy c'al in tomquil tam biyat ejate an inic. Max ca tsemets in tomquil, tamna' an tomquith uxum yabats uchbith c'al an ts'ejcath cau tin cuenta jaja' axi pelac in tomquil. **3** Max ca juncun nixe' xi tomquith uxum c'al q'ue'at i inic biyat ejate in tomquil, tamna' pel i inicbe. Max ca tsemets in tomquil, ma tamna'its ojni' yabats uchbith c'al nixe' xi ts'ejcath cau tin cuenta jaja' axi pelac in tomquil. In ejtohual ca tomquin c'al q'ue'at i inic ani yab pel i inicbe.

4 Antsana' tata'chic ebchalabchic, yabats it uchbith c'al an ts'ejcath cau binath c'al a Moisés cum tsemets a Cristo. Xo' ejthachits a Cristo, ani ejtil max it tomquithits c'al jaja' ani ja'its jaja' pel ti c'al. Xo' a cua'alchic a uchbil ca t'aja'

jahua' in le' a Dios. ⁵Ti jayq'ui' i t'ajamal jahua' in le' i hualbith t'ajtal ey. Aba ani' i exlamal jahua' in le' an ts'ejcath cau binath c'al a Moisés, bel i t'ajamal jahua' in le' i anam t'u'ul. Tin ebal nixe' xi hualbith t'ajbilab ne'etsac cu tsemets abal ets'ey. ⁶Xo' ejtil max huahua' u tsemenequits tin cuenta an thuchath ts'ejcath cau binath c'al a Moisés ax tu c'unat abatnamal. Yabats ja ax tu abatnal. An Espíritu Santo jats tu abatnal c'al i ichich itmethachits. U hualcathits abal qui t'ajchi in culbeta a Dios.

I hualbith t'ajtal ey

⁷Auxé' max qui ulu abal an thuchath ts'ejcath cau binath c'al a Moisés tu t'ajchal cu hualbin. Ni abal jay iba qui ulu antsana'. Pel in ey tu tso'oblinchal jahua' pel i hualabtalab. Yab u tso'obnamalac max pel i hualabtalab cu c'a'inchi jahua' pel in c'al q'ue'at i inic max yab tin uchamalac an ts'ejcath cau binath c'al a Moisés yab cu c'a'inchi. ⁸Aba ani' tin uchamal antsana', bel u lejatna' an hualabtalab tu ichich. U exla' abal pel i hualabtalab cu c'a'inchi, ani bel thayc'an yan i hualbith le'nomtalab tu ichich. C'al nixe' xi thuchath ts'ejcath cau jats c'al tu ats'al in lej jolbith tu ichich tam in hualbinal. ⁹Ti jayq'ui' yab u ats'anchi in alem nixe' xi ts'ejcath cau, ani u tsalpay abal ne'ets quin c'uajiy abal ets'ey c'al a Dios. Matam tu ats'anchits, tam ojni' u exla'its abal pel in hualbinel ani yab ne'ets quin c'uajiy abal ets'ey c'al a Dios. ¹⁰U exla'its abal yab ne'ets quin c'uajiy abal ets'ey c'al a

Dios, aba ani' pithnenec an ts'ejcath cau abal tiquin tolmiy quin c'uajiy abal ets'ey c'al a Dios. ¹¹Aba ani' u exla' an ts'ejcath cau, bel u lejatna' an hualabtalab tu ichich ani jats tin c'ambiy. Cum yab u putumal c'al nixe' xi ts'ejcath cau, u exla'its abal yab ne'ets quin c'uajiy abal ets'ey c'al a Dios.

¹²Pel in ey an ts'ejcath cau jahua' a Dios im pitha' a Moisés t'ocat. Tu uchbiyalchic qui t'aja' jahua' t'ocat ani jahua' bolith ani jahua' alhua'. ¹³Yab cu ulu abal tin ebal nixe' xi ts'ejcath cau yab ne'ets quin c'uajiy abal ets'ey c'al a Dios. Ni abal jay iba cu ulu antsana'. Yab ne'ets quin c'uajiy c'al a Dios tin ebal u hualab. Lej alhua' an ts'ejcath cau cum tin tso'oblinchi jant'o in lej ey an hualabtalab, ani tin tejhua'methanchi abal c'athpich quithab an hualabtalab tin t'ajchal.

¹⁴I tso'obits abal a Dios tu pitha' an ts'ejcath cau, tocat yab u ejtohual cu putu cum u t'ajtal ey c'unat abatnab c'al an hualabtalab. ¹⁵Yab u lej ejtiyal jale' u t'ajal jahua' u t'ajal. Yab u t'ajal jahua' u le'ac cu t'aja', tocat u t'ajal jahua' u pojcalac. ¹⁶U t'ajal jahua' yab u le' cu t'aja', ani jats tin c'anchalac an ts'ejcath cau yab cu t'aja'. Jaxtam u exlalits abal alhua' an ts'ejcath cau. ¹⁷Cum u t'ajal jahua' yab alhua' ani yab c'al u culbeta, yab lej nana' ax u t'ajal. Jats an hualabtalab ax tin c'uajchim tu ichich. ¹⁸Tin cuenta u t'ajtal ey tu ichich u tso'obits abal ni jant'o yab hua'ats alhua'. U le'ac cu t'aja' jahua' alhua' ani yab u ejtohual. ¹⁹Yab u t'ajal alhua' aba ani' u le'ac, tocat u t'ajal jahua' yab

alhua' ani jats yab u le' cu t'aja.

20 Cum antsana' u t'ajal jahua' yab u le' cu t'aja', yab lej nana' ax u t'ajal. Jats an hualabtalab ax tin c'ujchim tu ichich.

21 Antsana' u t'ajal jahua' yab alhua', aba ani' u le'ac cu t'aja' jahua' alhua'. Expith u elal tu ichich jahua' yab alhua'. **22** Tu lej luputh ichich u culbetnanchal in abatnaxtal a Dios cu t'ajchi. **23** Aba ani' u culbetnanchal, bel hua'ats tu inicital in tsap an hualabtalab c'al tin c'unat abatnab ani c'al tin tomolnanchab u culbetal.

24 In lej ts'ejhuantal tu ey. ¿Jita' ne'ets tiquin atanthanchi an hualabtalab tu anam t'uul abal yab quin tsemets abal ets'ey?

25 Lej c'ac'namal yan a Dios, cum expith i Ajatic Jesucristo ne'ets tiquin atanthanchi an hualabtalab. C'al patal u ichich u t'ajchalac in abatnaxtal a Dios, ani tam tin c'unat abatnab c'al in tsap an hualabtalab tocat u t'ajal i hualabtalab.

Axi c'ujat juncuth c'al an Espíritu Santo

8 Cum huahua' u ts'at'bathits c'al a Cristo Jesús jaxtam a Dios yabats tu tsu'tal tu jolbith. Yabats i t'ajal jahua' in le' i hualbith t'ajtal ey, i t'ajal jahua' in le' an Espíritu Santo. **2** An Espíritu Santo tu tsapliyachic ani tu it ejatliyachic cum u ts'at'bathits c'al a Cristo Jesús. Tu hualcanthamalits ani yabats tu c'unat abatnab c'al in tsap an hualabtalab ani c'al in tsap an tsemla. **3** An ts'ejcath cau binath c'al a Moisés yab in

ejtou tucu tolmiy tin cuenta an hualabtalab, cum tin ebal i hualbith t'ajtal ey yab i ejtohual qui putu c'al an ts'ejcath cau. Jaxtam a Dios in aba' in lej Tsacamil ca tsemets tin cuenta an hualabtalab, aba ani' jaja' yab pel i hualbith inic ejtil huahua'. Cum tsemets a Cristo ti calchix jolbinel, jaxtam yabats in cua'al in tsap an hualabtalab abal tucu c'unat abatna'. **4** Xo' i ejtohual qui t'aja' bolith jant'ini' in le' an ts'ejcath cau binath c'al a Moisés, cum i t'ajal jahua' in le' an Espíritu Santo. Yabats i t'ajal jahua' in le' i hualbith t'ajtal ey.

5 Jitats in t'ajal jahua' in le' in hualbith t'ajtal ey, expith in tsalapnal in cuete' le'nomtal. Jitats in t'ajal jahua' in le' an Espíritu Santo, expith in tsalapnanchal in le'nomtal an Espíritu Santo. **6** Ne'ets ca tsemets abal ets'ey jitats in tsalapnal expith in cuete' le'nomtal. Ne'ets ca ejatliyat abal ets'ey ani ca c'ujiy jun ejet c'al a Dios jitats in tsalapnanchal in le'nomtal an Espíritu Santo. **7** Pel i tomolnax c'al a Dios jitats in tsalapnal expith in cuete' le'nomtal. Yab in le' ani yab in ejtohual quim putu c'al in abatnaxtal a Dios. **8** Jitats in t'ajal jahua' in le' in hualbith t'ajtal ey, yab in ejtohual quin t'ajchi jaye jahua' in le' a Dios.

9 Tata'chic yab a t'ajal jahua' in le' a hualbith t'ajtal ey, tocat a t'ajchalchic jahua' in le' an Espíritu Santo ax ti c'ujchim ta ichich. Axi yab c'ujchith c'al an Espíritu Santo yab pel in c'al a Cristo. **10** Aba ani' max it c'ujchithchic c'al a Cristo, bel it tsemelchic cum it

hualbinenec. C'al a ejattal ojni' it it ejatlithits, cum a Dios ti tsu'talchic tit bolith. ¹¹ A Dios in ejtha' a Cristo Jesús ti al an jolimtalab. Aba ani' ne'ets quit tsemets, bel a Dios ne'ets ti ejtha'chic max it c'uauchith c'al an Espíritu Santo.

¹²Ebchalabchic, xo' i cuá'al i uchbil c'al a Dios abal yabats qui t'aja' jahua' in le' i hualbith t'ajtal ey. ¹³Ne'ets cu tsemets abal ets'ey max i t'ajal jahua' in le' i hualbith t'ajtal ey, ani ne'ets cu c'uajiy abal ets'ey max an Espíritu Santo tucu tsemthanchi jahua' in le' i hualbith t'ajtal ey.

¹⁴Pel i tsacamlab c'al a Dios jitats abatnab c'al an Espíritu Santo.

¹⁵Yab qui ts'ejnanchi in abatnaxtal an Espíritu Santo ejtil max pel in huat'ath c'unat abatnaxtal i amulab. Cum i bats'umalits an Espíritu Santo pel tu tsacamilchic a Dios, ani c'al i ichich lej canatbethachits c'al an Espíritu Santo i bijiyal a Dios ti lej Tata. ¹⁶An Espíritu Santo ojni' tu tso'obliyalchic ti lej ichich abal pel tu tsacamilchic a Dios.

¹⁷Cum pelits tu tsacamilchic ne'ets cu pithan i c'alab c'al a Dios, ani jahua' pel in c'al a Cristo pelitshue i c'al. Max xohue' i junax yajchicnal c'al a Cristo, tam talbel ne'ets cu junax c'uajiy c'al jaja' ti eb tin ts'alat c'uaujattal a Dios.

¹⁸Nan tu tsalap yab jahua' lej yajchic jahuaquits tam yajchictalab qui yajchicna' teje' tsabal, cum talbel a Dios ne'ets tucu tejhua'methanchi in lej ts'alat ti eb. ¹⁹Tim patal in ts'ejcabil a Dios axi ti eb ani ti tsabal c'al in lej canat in lej aychal a Dios ca

tejhua'methanchinchat in ey in tsacamilchic a Dios. ²⁰Cum patal jahua' a Dios in ts'ejca' in q'uiba' in chubax c'al ti ts'ejcanenec, jaxtam jolatmetha jant'inits in culbetal a Dios. Yab jolatmetha tin cuete' culbetal. Xo' u aychab a Dios quin alhua'metha' junil. ²¹U aychab a Dios quin hualcantha' in ts'ejcabil yabats ca c'unat co'oyat ani yabats ca othiyat c'al an hualabtalab, jant'iní a Dios jaye ne'ets quin jum putat hualcantha' in tsacamilchic talbel. ²²I tso'ob abal xo' patal in ts'ejcabil a Dios u ej'el c'al an yajal jant'iní jun i uxum axi co'oth ani hue'its ne'ets quin tsu'u in tsacamil. ²³Huahua'hue ax u c'uauchith c'al an Espíritu Santo u ej'el ti ichich. A Dios tu pithamalits an Espíritu Santo abal tucu tso'obliy abal ne'ets cu tala' pithane talbel ti eb jahua' bijithits ne'ets cu pithan cum pel tu tsacamlab c'al a Dios. Ma ne'ets cu pithan i it inictal axi yab teje' tsabal. ²⁴Ma tam ti a Dios tu jec'onthamalchic c'al an hualabtalab i ts'i'quiy qui aychi jahua' a Dios ne'ets tucu pithaye. Max qui tsu'uhuits jahua' i aychamal qui tsu'u, tam yabats ne'ets qui más aychi jant'o qui tsu'u. ²⁵Max yabaye i tsu'umalits jahua' i aychal. tam qui achiye c'al i c'aya'talab.

²⁶Jats an Espíritu Santo ax tu tolmiyal i ts'ejhuantal ichich tam cu olon. Tam yab i tso'bim jant'iní tucu olon, an Espíritu Santo jats ax tu conchinchal jant'o c'al a Dios. Tam yab qui ela' i cau ti ichich cu olon, tocat u ej'el ti ichich, tam an Espíritu Santo tu mo'canchinchal

i ejejeltal c'al a Dios. ²⁷A Dios tu exlanchalits tin luputh i ichich ani jaye in tala' exlanchal in le'nomtal an Espíritu Santo tam ca conchinchixin. Cum huahua' pel tu c'al a Dios, ets'ey tu conchinchal an Espíritu Santo jant'inits in le' a Dios.

An atax

²⁸I tso'obits abal a Dios in calthanchal jant'o alhua' c'al patal jahuaquitsq'ui ti quin tamu jitats c'anithom c'al jaja' ani tacuthits tin c'al jaja' tin ebal in le'nomtal a Dios.

²⁹Jats jaja'chic axi q'uejab exla ani q'uejab tsalpanchatits c'al a Dios quin ejtilnanchi in ey in Tsacamil Jesucristo. Ja'its a Jesucristo axi c'athpich pulic in ey c'al axi yantalam i ebchalab. ³⁰Axi antsana' q'uejab tsalpanchatits, jaye tacuyat c'al a Dios. Xo' tsu'tatis ti bolith c'al a Dios ani pithnenequits im puhuethach ey c'al a Dios.

³¹I ulal abal lej c'athpich alhua'talab abal antsana' a Dios tu t'ajchamalits. Cum a Dios pel i lej c'athpich alhua' inic c'al huahua' jaxtam lej jolatits max jita' tucu tomolna'. ³²Ma im bina' in lej Tsacamil ca tsemtha ti calchix c'al huahua', ani yab in c'aniy. Cum antsana' im bina'its, jaquitsq'ui más ne'ets tucu lej pitha' patal jahua' qui yejenchi. ³³Cum a Dios in tsu'talits ti bolith jitats tacuthits c'al jaja', jolat max jita' in le' quin t'e'tsiy. ³⁴Jolat max jita' quin le'na' quin jolbiy, cum tsemets a Cristo ti calchix c'al axi tacuthits c'al a Dios. Ani yab expith ja, jaye ejthajits a Cristo ani xo' c'uajatits tin huinab ocob a Dios ti conchinchix c'al

huahua' tin tamet a Dios. ³⁵Jolat max jita' quin le'na' quin c'anchi a Cristo abal yabats tucu c'anitha'. I exlalits abal jaja' tu junini' c'anithal aba jahuaquitsq'ui qui huat'a', i yajchictalab, i uhuanthaxtalab, i othnaxtalab, i jayil, i c'ot'ihtalab, i c'ac'athtalab, ma i tsemthaxtalab.

³⁶In ulal an T'ocat Thuchlab:

Patal a q'uicha hua'ats jita' in le' tucu tsemtha' cum i c'ac'nanchal im bij a Dios. Tu t'ajchalac ejtil max pel tu ovejachic cu tsemtha c'al an tsemthom t'u'lec.

³⁷C'al patal jant'oquitsq'ui cu t'ajchin, a Cristo tu c'anithale ani tu lej c'athpich atanthalch.

³⁸Lej thacat u ichich, cum yab jant'o hua'ats c'al ca c'anchin a Dios abal yabats tucu c'anitha'. Ni an tsemla, ni jahuaquitsq'ui qui tamu teje' tsabal, ni i ángelchic, ni i teneclabchic, ni jahua' yajchic i huat'alits xohue', ni jahua' qui huat'aye, ni jant'o yab in ejtohual quin t'apchi in c'anithomtal a Dios. ³⁹Jahua' ti eb, jahua' ti tsabal, jahuaquitsq'ui tam ts'ejcabilab c'al a Dios, ni abal jay yab in ejtohual quin c'anchi a Dios abal yabats tucu c'anitha'. A Dios tu junini' tejhua'methanchal in c'anithomtal lej pulic c'al i Ajatic Cristo Jesús.

A Dios in tacuyamat an Israelchic

9 Cum in ts'at'bath c'al a Cristo tu uchalchic an chubaxtalab ani iba an janamtalab. An Espíritu Santo tu ichich tin tso'obliyal abal chubax jahua' ne'ets tu ucha'. ²In lej t'e'pith ani ets'ey lej yajchic u ichich c'al u at juntal xits'al. ³Ma

u le'ac quin t'ajat q'uibey max anac cu tolminchichic, ani yabats cu bela' a Cristo max anac quim bela'chic. ⁴Pel jaja'chic an Israel axi ti jayq'ui' pelac i tsacamlab c'al a Dios. A Dios c'uajiy c'al jaja'chic in tejhua'methachiquinchi in ts'alat. Im pitha'chic i jilchith cau ani jaye an thuchath ts'ejcath cau c'al a Moisés. Im pitha'chic i tiyopan jun ti quin c'ac'na' a Dios. Im bijchith ucha'chic yan jant'o ne'ets quim pitha'chic ani yan jant'o ne'ets quin t'ajchichic. ⁵An Israelchic pel i at xits'lab c'al am biyalabchic axi pel i lej oc'chith tatalabchic. Tin cuenta in anam t'uul, a Cristo pel i at xits'lab c'al jaja'chic. Ja'its jaja' pel a Dios c'al tim patal jahua' hua'ats abal ju'tamq'ui. Jaxtam qui puhuethanchi im bij abal ets'ey.

Amén.

⁶A Dios yab in jila'its ca ijcan ti tsabal an cau jahua' im bijchith uchamal an Israelchic ne'ets quim baju. Yab patalchic axi hua'tsinenec Israel im bajuhual ca ajiyat c'al a Dios ti al an lej chubax bichou Israel. ⁷Yab expith abal pel i 'at xits'lab c'al a Abraham patalchic ca ajiyat ti lej chubax tsacamlab c'al a Abraham. A Dios in ucha' a Abraham abal axi ca hua'tsin c'al a Isaac jats ca ajiyat tin lej tsacamilchic. ⁸C'al axe' xi cau i ejtiyal abal vab tin ebal in at xits'alq'ui ne'ets quim baju i inic ti lej tsacamlab c'al a Dios. Expith im bajuhual max a Dios quim bijchith ulu ne'ets quim baju. ⁹A Dios im bijchith ucha' a Abraham antse': Ne'ets tu tsa'biy tam quim baju an q'uij jant'iní' nana' u ulumalits, ani a Sara ne'ets quin co'oy i tsacam.

¹⁰Bijchith uchan jaye a Rebeca c'al a Dios abal ne'ets quin tsu'u i cuaya' inicchic. In tata jaja'chic pel a Isaac axi pel i biyal tatalab c'al huahua' tu Israel. ¹¹⁻¹³Tam ti yabaye hua'tsinenec an cuaya'chic ani yabaye in t'ajmal jahua' alhua' ni jahua' yab alhua', uchnenequits a Rebeca c'al a Dios antse': An oc'ox tsacam Esaú ne'ets ti tolmix c'al an tsabchilab Jacob. Jahua' antsana' uchan a Rebeca c'al a Dios ejtil an cau axi thuchath al an T'ocat Thuchlab jun tin ulal a Dios: U c'anitha' a Jacob ani u pojca' a Esaú. Tam tin ulu antsana' a Dios, in tejhua'metha' abal in cua'al in cuete' culbetal quin tacuy jitats quin le'na' jaja' quin tacuy. In tacuyal expith jant'inits jaja' in tsalap, ani iba tin ebal jahua' in t'ajal an inic.

¹⁴¿Jant'o qui ulu tamna' abal a Dios in tacuyal jitats quin le'na' quin tacuy? Auxe' qui ulu yab alhua' abal in tacuyal axi jun ani axi junaque iba. Abal jay iba qui ulu antsana'.

¹⁵A Dios in ucha' a Moisés: Nan ne'ets cu yajnanchi jitats cu le'na' cu yajnanchi, ani ne'ets cu let'entha' jitats nan cu le'na' cu let'entha'.

¹⁶Antsana' yab u let'enthalab an inic tin ebal in cuete' le'nomtal ni tin ebal in t'ajbil, expith max pel in le'nomtal a Dios. ¹⁷Ti al an T'ocat Thuchlab u olnab jahua' uchan an ts'ale Faraón ti Egipto c'al a Dios antse': Nan tu punuhual tit ts'ale abal cu tejhua'metha' u tsap ani quin exlanchat u bij tim puhuel an tsabal c'al jahua' ne'ets tu t'ajchi. ¹⁸A Dios in let'enthal jitats quin le'na', ani in jilchal abal ca tsapicme in ichich jitats quin le'na'.

19 Hualam max tata' ne'ets tiquin conomichiquiy cum antsana' tin jilchal a Dios an inic, jale' tamna' u jolbix a Dios c'al an inic. Tamna' nix xi inic yab in cuete' tomolnanchal in le'nomtal a Dios, ne'ets ca ulu. **20** ¿Tata' ojni' jant'o tit c'uiyath cononma' c'al a Dios? Max in ejtohualac ti cau jaye i mul anam, hualam max in tomnalac quin conomichiquiy an thacum jale' ti ts'ejcame jant'ini' ti ts'ejcame. **21** An thacum in cua'al in cuete' culbetal quin ts'ejca' c'al an anam jant'initis quin le'na'. C'al juncats i mule' i anam in ejtohual quin ts'ejca' pil i eyextalab, axi lej exbath ani axi hue' iba.

22 Ti jayq'ui' a Dios in abchamal an inicchic i yajchictalab ani antsana' in tejhua'methanchi in cuete' tsap. Jaye in c'aya'namalchic axi jolbith ani in tomnamalac quin abchi an yajchictalab abal ca t'ajat q'uibetha. **23** Antsana' tin t'ajamat a Dios abal tucu tejhua'methanchi in huinat ts'alat. Ani xo' jats huahua' tu yajnanchal ani tu t'ojojoy abal cu c'uajiy c'al jaja' tin ts'alat coytal. **24** Tu tacuyamalits tu c'al a Dios. Hua'ats axi Israelchic ani hua'ats axi yab Israelchic ax in tacuyamalits. **25** In ulal a Dios ti al in thuchath cahuintal a Oseas antse':

Ne'ets cu bijiy tu bichohuil axi
yab pelac u bichohuil.

Ne'ets cu bijiy tu c'an c'al axi
yab u c'anithamalchic.

26 Ne'ets cu bijiy tu tsacamilchic
axi yab pelac i tsacamlab c'al
nana'. In Dios in ejat abal
ets'ey.

27 A Isaías in olna' abal an Israelchic ne'ets ca lej yaney, ma yab ne'ets ca ejtohuat ca ajiyat ejtil yab ca ajiyat axi yantalam i quithib ti pulic lejem. Aba ani' hua'ats yantalam, expith ne'ets ca jec'ontha jun i cuenel. **28** Cum an Ajatic ne'ets quin thubat tala' ts'ejca' an inicchic axi teje' tsabal jant'ini' in ulumalits ne'ets quin t'aja'. **29** In ulu jaye a Isaías tin cuenta an Israelchic:

A Dios axi Abatnom tim puhuel
an tsabal ani an c'ay'lal tu
jilchamal ejat i tsacamlabchic.
Max yab tu jilchamalac, u t'ajat
q'uibamejaquits ejtil axi ti
bichou Sodoma ani ti bichou
Gomorra t'ajat q'uibame.

An Israelchic ani an alhua' cau

30 ¿Taley jant'o qui ulu tin cuenta jahua' in t'ajal a Dios? I ulal abal a Dios in tsu'talchic ti bolith axi yab Israelchic ani yab in luba'chic ca tsu'tat ti bolith c'al jaja'. Cum im belalchic a Cristo, jats tu tsu'tab ti bolithchic c'al a Dios. **31** An Israelchic ojni' in luba' quim putu c'al an ts'ejcath cau abal ca tsu'tat ti bolith c'al a Dios, ani yab in ejtouchic quin tala' putu. **32** ¿Jale' hualam yab im bajuchic ca tsu'tat ti bolith c'al a Dios? Jats cum yab im belamalchic a Cristo, tocat in q'uibts'oth tsalpay abal ne'ets ca tsu'tat ti bolith c'al a Dios expith max quim putu c'al an ts'ejcath cau. Pelchic ejtil axi ca t'ithc'on al i t'ujub, ani nixe' xi t'ujub ejtil a Cristo cum yab im belamalchic. **33** Antsana' tu olnab a Cristo ti al an T'ocat Thuchlab. In ulu a Dios:

Ne'ets cu aba' jun i inic axi ejtil
i t'ujub ti bichou Sion jun

ti ca t'ithc'uan ani jun ti ca cuajlan i inicchic.

Bel jitats quim bela', yab ne'ets ca tithebe ti belom.

10 Ebchalabchic, nan c'al patal u canat u lej conchal a Dios abal quin jec'ontha' an Israelchic c'al in hualab.² U tso'obits abal lej c'a'inchix jaja'chic c'al a Dios, expith yab in exlal jant'ini' ca jec'onthachic.³ Yab in exlalchic jant'ini' ta ca tsu'tat ti bolith c'al a Dios. In lej lubalchic ca tsu'tat ti bolith jant'inits jaja' in cuete' tsalap ani yab jant'ini' in tsalap a Dios.⁴ Tocat quim bela'chic a Cristo ani ne'ets ca tsu'tat ti bolith c'al a Dios. Yabats in yejenchal quin ayna' an ts'ejcath cau binath c'al a Moisés abal ca tsu'tat ti bolith.

⁵ A Moisés in thucha' max jitats quin tala' putu c'al jahua' in ulal an ts'ejcath cau, jats axi ne'ets ca c'uajiy c'al a Dios max anac. Tam ne'ets ca tsu'tat ti bolith c'al a Dios.⁶ Huahua' ax u tsu'tatits tu bolith c'al a Dios cum i belal a Cristo yab i ulu antsana'. I ulal abal ni jita' yab in yejenchal ca c'athiy ti eb quin ucha' a Cristo ca pa'iy tsabal.⁷ Ni jita' yab in yejenchal ca pa'iy alal jun ti c'uajat in ejattal an tsemelomchic quin ucha' a Cristo ca c'athiy tsabal yabats ca c'uajiy c'al an tsemelomchic.⁸ I ulal abal pa'iyits teje' tsabal a Cristo ani calnequits ejthach jun ti jolnenec. Jats an alhua' cau ax it ejtohuab quit olchinchic ani quit t'aychinchic ta ichich. Jats an alhua' cau axi huahua' tu olchinchalchic ani ca lej bela'.⁹ Jats ca bela' ta lej ichich abal a Dios in ejthamalits jun ti

jolnenec, ani ca olna' abal a Jesús ja'its an Ajatic. Tam ojni' a Dios ne'ets ti lej jec'ontha'chic c'al a hualab.¹⁰ Jitats antsana' quim bela' tin lej ichich, ja'its axi ne'ets ca tsu'tat ti bolith c'al a Dios. Jitats quin olna' abal a Jesús ja'its an Ajatic, ja'its axi ne'ets ca jec'ontha c'al in hualab.

¹¹ In ulal an T'ocat Thuchlab abal jitats quim bela' a Cristo yab ne'ets ca tithebe ti belom.¹² A Dios yab im poc'oth tsu'tal an Israelchic ani axi yab Israel. Cum pel i Ajatic c'al patal an inicchic in lej lablinchal jitats c'al ta ca palenchat.¹³ Antsana' ti thuchathits abal

patal jitats quim palenchi im bij an Ajatic ne'ets ca jec'ontha.¹⁴ Biyat yabaye im belamalchic yab ne'ets quim palenchi, ani yab ne'ets quim bela' max yab ca olchinchatchic im bij an Ajatic. Ani yab ne'ets ca olchinchatchic max yab hu'aats i olchinchix.¹⁵ Ani ni jita' yab in ejtohual ti olchinchix max yab ca abatna c'al a Dios. An T'ocat Thuchlab in olnal axi olchinchix antse': Lej alabel in xe'tsintal jitats xe'ets ti olchinchix c'al an alhua' cau c'al ca jun ejetbethanchat in ichich an inicchic c'al a Dios.

¹⁶ Yab patal an inicchic axi ca olchinchat an alhua' cau ne'ets quim bina' in xutsun quin ats'a'. Antsana' in tsalpay a Isaías tam in conoy a Dios jita' ne'ets quim belchi in cahuinal.

¹⁷ An inicchic quin ats'a' an alhua' cau ani tam ne'ets quin ejtou quim belchi. Quin ats'anchi jahua' ca olnanchat tin cuenta a Cristo.

¹⁸ Auxe' max an inicchic yab in ats'amal an alhua' cau. Jal i in

ats'amalits jant'ini' tin ulal an T'ocat Thuchlab antse':

A Dios in aba' i olchinchixchic tim puhuel an tsabal quin olchinchi an inicchic in cahuintal. Ulthanchatis in cahuintal ma ju'tamits hua'ats i inic.

¹⁹Hualam max an Israelchic yab in lej t'ajchi ti cuenta in cahuintal a Dios antse'. Moisés in thucha' jahua' in ulu a Dios:

Ne'ets cu t'aja' abal tata' an Israelchic ca pa'ixna' i bichou axi yab pel u c'al.

Ne'ets quit tsacuychic tam nan cu tolmiy am bichou axi yab tin ejtinchal u cahuintal.

²⁰C'al i lej inictalab a Isaías in olna' jahua' in ulu a Dios antse':

Tin ela' i inicchic axi yab tin aliyamal.

U tejhua'metha' tu ba' c'al axi yab in luba'chic tiquin exla'.

²¹A Isaías in olna' jahua' in ulu a Dios tin cuenta an Israelchic antse': Patal a q'uicha u canimichicamalits abal ca chich c'al nana', ani pel i bichou axi lej jec'om ani t'ujbabath in ichich.

An Israelchic axi jec'onthach

11 Auxe' max a Dios in tala' pojcamalits im bichohuil Israel. Abal jay iba. Nana' pel in Israel ani pel in at xits'lab c'al a Abraham. In hua'tsin ti al an cuenel Benjamin. ²Ti jayq'ui' a Dios in tacuyamalits an Israelchic tin c'al. Hualam max yab a tso'obchic jant'ini' ti thuchath an Israelchic ti al an T'ocat Thuchlab tam ti jolbiyat c'al an caulome Elias tam

tu ol jaja'. A Elias in ucha' a Dios:

³Ca t'aja' ti cuenta Dios, abal jats an Israelchic ax in tsemthamal a caulomejilchic. Expith nan in jilc'on, aba ani' in lej le'na' tiquin tsemtha'ne. In ijcamalchic an ts'acnaxtalab jun ti c'ac'nax an inicchic c'al a bij. ⁴Toc'tsiyat a Elías c'al a Dios: Hua'atse buc i mil i inicchic ax u tacuyamal yabaye in tuthumalchic in c'ualal ti c'ac'nax c'al an thulcuts axi uxnal ti Baal. Antsana' in ulu a Dios. ⁵Aniye jaye xohue' hua'atse i cuenel an Israel axi tacuthits pel in c'al a Dios tin ebal in alhua' inictal a Dios. ⁶Max u tacuyab tin c'al a Dios i inic tin ebal in alhua' inictal a Dios, tam yab ja tin ebal jahua' in t'ajamal. Max u tacuyab tin ebal jahua' in t'ajamal, tam yab ja tin ebal in alhua' inictal a Dios.

⁷¿Jant'o qui ulu tam max hua'ats axi tacuth tin c'al a Dios ani hua'ats axi iba? Jat'hua' tim fatal an Israelchic yab im bajumal ca c'alna c'al a Dios, aba ani' in lej lubamalchic quim baju. Expith axi tacuthchic c'al a Dios, jats im bajumalits tin c'al jaja', ani axi q'ue'atchic t'ujbathmejits in ichich tocat. ⁸Antsana' in ulal an T'ocat Thuchlab: A Dios in jila'chic ca t'ujbathme in ichich ani yab ca ejtinchat in cahuintal. In jila'chic ca joc'tsibe ani ca tsinebe tin cuenta in cahuintal a Dios. Ma xohue' antsana'its in eychic. ⁹Aniye ti jayq'ui' in ulu a David antse':

Jila' ca ts'auc'un ani ca t'apchin in tsalap c'al in cuete' culbetal. Ca t'ithc'onchic ani ca yajchiquiyat c'al in cuete' xe'tsintal.

10 Ca joc'tsimechic ani yabats ca tsu'xin.
Ca ets'ey xe'tsinchic cututul c'al in cuete' quital.

**Jec'onhab c'al a Dios
axi yab Israelchic**

11 Auxe' max an Israelchic t'ithc'onenec ani t'ajat q'uibenequits. Ni abal jay iba. Cum jec'ombe an Israelchic c'al a Dios, jaxtam hua'ats i q'uij xohue' ca jec'ontha axi yab Israelchic. Tam an Israelchic quin tsu'u u jec'onhabchic axi yab Israel, tamna' quin le'na' jaye ca jec'onthachic. **12** Jec'ome an Israelchic ani xo' u lablinchab c'al a Dios q'ue'at i inicchic tim puhuel an tsabal. Xo' tixc'anenec an Israelchic c'al a Dios ani u lablinchab axi yab Israelchic. Max antsana' u lablinchab axi yab Israel biyat an Israelchic ou ti c'uajat c'al a Dios, talbel ne'ets ca lej c'athpich lablinchat an inicchic tam ca huichiy an Israelchic c'al a Dios.

13 Nan u le' tu ucha' jun i cau tata'chic axi yab it Israel. Cum a Dios tin aba' quin t'ojon c'al tata'chic, u tso'ob abal lej exbath u t'ojlabil. **14** U le'ac max cu ejtou cu canatbethanchi in tsalap jaye u at juntal Israelchic abal quin le'na' ca jec'onthachic jaye jant'ini' tata'chic tit jec'onthamejits. **15** A Dios im pojcamal an Israelchic axi jec'om c'al jaja', ani xo' in huichbal ti ja'ublab c'al jaja' q'ue'at i inicchic. Talbel tam ca huichba junil ti ja'ublab c'al a Dios an Israelchic, ojni' ne'ets ca it ejatliyat ani yabats quin tsu'u am pulic tsemla. **16** Max i binal jum pejach i mule' i c'oye

a Dios, i exalits abal tim patal an mule' pel in c'al a Dios. Max in ibil i te' pel in c'al a Dios, jayetseq'ui tam pel in c'al in c'ue'elchic an te'. Antsana' am biyal Israelchic pel in c'al a Dios ani jaye in tsacamilchic ne'ets quim bajuye tin c'al a Dios.

17 An Israelchic pelac ejtil i c'ue'labchic c'al i alhua' olivo te'. Tata'chic axi yab it Israel ejtil i c'ue'lab c'al i thimalon olivo. Cum an Israelchic yab im bela' a Cristo jaxtam a Dios in muts'inchi in c'ue'el nixe' xi alhua' olivo te'. Ani tata'chic axi yab it Israel a Dios ti ts'ot'c'óthliy jun ti ts'at'atac jaja'chic. Cum ejtil it ts'at'atits al an alhua' olivo te', jaxtam a tabatnanchal in ibil ani in xits'al. **18** Yab ca tsalpsychic abal tata' it c'athpich alhua' ani an Israelchic iba. Yab ca tsalpay antsana', cum tata' yab a tsapliyal in ibil an alhua' olivo te', expith it tsapliyab c'al.

19 Hualam ne'ets ca ulu abal a Dios in muts'inchi in c'ue'elchic nixe' xi alhua' olivo te' abal tata' ti ts'ot'c'óthliy taja'. **20** ¿Jale' ti muts'inchatchic? Cum yab im bela'chic a Cristo. Ani a Dios ti ts'ot'c'óthliy tata'chic expith cum a belal a Cristo. Jaxtam yab ca c'athatna'chic ta ba', tocat ca t'aja' ti cuenta ani i canats quit muts'iyatte.

21 A Dios in muts'inchi in t'ajtal c'ue'elchic an alhua' olivo te', ani in ejtohualac ti muts'iyte ax it ejtil i ts'ot'c'óthlith c'ue'lab. **22** Ca lej t'aja'chic ti cuenta abal a Dios pel i alhua' inic ani jaye tsapic in t'ajal. Tsapic in t'ajchamal an Israelchic axi yab im bela'chic a Cristo. Ti t'ajchi alhua' tam ti ts'ot'c'óthliy

al an alhua' olivo te'. Ca lej alhua' ayna' a Dios abal ti junini' co'onchi c'al in alhua' inictal. Max i ne'ets ti muts'iyte abal yabats quit c'uajiy al an alhua' olivo te'. ²³Max an Israelchic ca huichiy ani quim bela' a Dios ne'ets ca ts'ot'c'óthliyat junil al an alhua' olivo te'. A Dios in huit'al quin ts'ot'c'óthliy chic.

²⁴A Dios ejtil ti jaca' axi yab it Israel al an thimalon olivo te' ani ti ts'ot'c'óthliy al an alhua' olivo te'. Yab it ejtil in t'ajtal c'ue'el an alhua' olivo te'. Max antsana' ti t'ajchi a Dios axi yab it Israel, jaquits más ne'ets quin t'ajchi antsana' axi Israel. Pel jaja'chic ejtil in t'ajtal c'ue'el chic an alhua' olivo te'. Yab q'uibat abal a Dios quin ts'ot'c'óthliy chic junil ti al an alhua' olivo te' jun ti ts'at'atac.

Tam ca jec'ontha tim patal an Israelchic

²⁵Ebchalabchic, nan u le' tu tso'oblinchi jahua' ma xo' pelac in tsinat tsalap a Dios abal yab ca c'athatna' a cuete' tsalap. A Dios in jilamalits i Israelchic ca t'ujbathme in ichich, ani antsana' ne'ets ca jilc'onchic ma ta ca quithat otsitsits c'al a Dios axi bijithits ca otsits axi yab pel i Israel. ²⁶Taley talbel a Dios ne'ets quin tala' jec'ontha' tim patal an Israelchic. Antsana' in ulal an T'ocat Thuchlab:

Ne'ets ca ulits an Jec'onthax tal ma ti Sion.

Ne'ets quin jec'ontha' axi xits'labchic c'al a Jacob c'al in hualab.

²⁷Cum u cua'al i jilchith cau c'al jaja'chic ne'ets cu tixc'anchi in hualab, in ulu a Dios.

²⁸Xo' jat'hua' tim patal an Israelchic im pojcal an alhua' cau. A Dios in tsu'talchic ti tomolnax c'al jaja', ani tata'chic axi yab it Israel it pithnal an q'uij c'al a Dios abal ca belchi an alhua' cau. Aba ani' pel i tomolnax an Israelchic c'al a Dios, bel c'an c'al a Dios cum ma tam ti biyalits a Dios in tacuyamalchic quim baju tin c'amac jaja'. ²⁹Max a Dios in tacuyamalits jita' quim baju tin c'amac, yab ne'ets quin jalc'uy in tsalap. Max im pithamalits jant'o, yab ne'ets quin tixc'anchi. ³⁰Ti jayq'ui' tata'chic axi yab it Israel a jec'omnamal a Dios, ani xo' jats an Israelchic ax in jec'omnal a Dios. Xo' a Dios ti yajnanchalchic tata'chic.

³¹Aba ani' jec'om an Israelchic, bel a Dios in ejtohual quin yajnanchi jant'ini' ti yajnanchal tata'chic.

³²A Dios in jilamalits tim patal an inicchic ca jec'omnaxin c'al jaja', ani xo' in ejtohualac quin yajnanchi tim patal an inicchic. ³³A Dios ojni' lej c'athpich luputh in huinat tsalap ani in ejtixtal. Yab i ejtohual qui thubat tala' ejtinchi in tsalap, ani yab i ejtohual qui tala' exbanchi jahua' in t'ajal. ³⁴Ni jita' tam inic yab in ejtohual quin lej exlanchi jant'o in tsalpayal a Dios. Ni jita' tam inic yab in ejtohual quin ts'alabchi a Dios. ³⁵Cum patal jant'o hua'ats pelits in c'al a Dios, an inic yab in ejtohual quin oc'ox ts'ejhualinchi a Dios abal talbel ca ts'ejhualinchat jant'o c'al a Dios. ³⁶Patal jahua' hua'ats jaja' a Dios in tujumal ani im beletnal. Patal jahua' hua'ats c'uajat abal ca puhuethanchat im bij a Dios. Qui puhuethanchi huahua' im bij abal ets'ey. Amén.

Ax im binal tim ba' c'al a Dios

12 Ebchalabchic, a Dios tu lej lablinchamalits. Jaxtam nan tu lej uluth uchalchic ca lej jum putat bina' ta ba' c'al jaja' ejtil max ca bina' i ts'acchixtalab axi ejat ani axi t'ocat. Max antsana' ta ca t'aja'chic ne'ets ca culbe a Dios, ani ne'ets ca putu c'al a lej uchbil tit c'ac'naxchic c'al a Dios. ²Yabats ca tsalapnanchi an xe'tsintalab axi teje' al an hualab c'ay'lal, tocat ca bina' ta ba' c'al a Dios abal jaja' ti jalc'unchi a tsalap. Tam ojni' ne'ets ca chubax exlanchi in alhua' ani t'ocat culbetal a Dios. Antsana' ne'ets ca culbe a Dios.

³Tin ebal in alhua' inictal a Dios im pithnenec u uchbil. Nan tu uchal ta fatalchic yab ca tsalpay tit c'athpich pulic a ey. Ca lej alhua' tsalpay ta junchictal ma ju'tamits huichat a Dios ti pithamal ca bela' jaja', ani antsana' ta ca junini' bela'chic. ⁴Huahua' ti inictal i cua'al yan i punchintalab, ani yab jununul in ey i punchintal. ⁵Yantalam ti eb huahua' ax u ts'at'bath c'al a Cristo, ani ti tamcuth yaneltal ejtil max pel inictal a Cristo. Ti junchictal ejtil max pel tu punchintal in inictal a Cristo.

⁶A Dios ti junchic ti junchic huahua' tu pithamalits pil i huit'omtalab jant'inits jaja' ti quin le'na'. Tocat qui alhua' eyentha' jahua' tu pithamal. Max u pithach i ey tu caulome, qui olnanchi an cau ax tu pithal a Dios jant'inits tu pithnenec qui bela' jaja'. ⁷Max pel tu tolmix c'al an inicchic, jats

qui lej tequeth t'aja'. Max pel tu exobchix c'al in cahuintal a Dios, jats qui t'aja' c'al fatal i ichich.

⁸Max i huit'al qui canatbetha' an inicchic abal más quim bela' a Dios, jats qui lej t'aja'. Max a Dios tu ts'ejhualiy jant'o, qui ts'ejhualiy c'al jum putat i ichich. Max pel tu eyal c'al an tamcunel ebchalab, qui lej luba' qui putu c'al i uchbil. Max i tolminchal an ts'ejhuantal, qui t'aja' c'al i lej culbetal.

In uchbilchic ax im belal a Cristo

⁹Quit tequeth c'anitháxin jun c'al xi jun ani yab expith quit eb c'anitháxin. Ca pojca'chic jahua' yab alhua' ani ca le'na' jahua' alhua'.

¹⁰Jant'ini' tin tomnal tit ebchalab quit c'anitháxinchic. Yab ca lej le'na' quit c'athpich c'ac'na ani axi q'ue'atchic hue' ca c'ac'na tocat.

¹¹Yab ca obetna' an t'ojlab, tocat ca lej luba' ca t'aja'. Quit t'ojon c'al an Ajatic c'al a ichich lej canat.

¹²Quit culbechic cum ne'ets ca ts'uchi in ts'alat a Dios. C'al a ichich c'aya' ca cuxuy an yajchictalab jahuats ca tamuchic. Yab ca pale'anchichic tit ol.

¹³Ca tolminchi ax im belalchic a Cristo tam in cua'al i yejenchixtalab. Ca bats'uchic an tsa'bix c'al tsab a c'ubac.

¹⁴Ca conchi a Dios abal quin lablinchi jitats ti otnalchic. Ca conchinchi i lablinchixtalab ani iba i yajchictalab.

¹⁵Quit junax culbechic c'al axi culbel ani ca yajnanchi ax u uc'nal c'al i t'e'pitthalab.

¹⁶Quit c'ujlelenchic jun ejet c'al a at inic. Yab ca c'athatna' ta ba'chic,

tocat ca ja'ubna' axi tsa'at in ey. Yab ca t'aja' tit c'athpich tsalpathchic.

¹⁷Max jita' ti t'ajchi i pojcaxtalab yab ca huichbanchi c'al i pojcaxtalab. Ca luba'chic ca t'aja' alhua' c'al fatal an inicchic. ¹⁸Ma ju'tam huichat a Dios ti pitha' a ejattal, ca luba' quit c'uajlelenchic jun ejet c'al fatal an inicchic.

¹⁹C'an ebchalabchic, yab ca huichbanchi max jita' ti t'ajchi quithab, tocat ca jilchi tin c'ubac a Dios ca yajchiquinchat. In ulal an T'ocat Thuchlab abal jaja' in cua'al in lej tsap quin huichbanchi ani quin jalbinchi c'al i yajchialtalab.

²⁰Jaye in ulal an T'ocat Thuchlab abal tata' ca pijchi jitats ti tomolnal max u c'a'il. Ca pitha' i ja' quin uts'a' max u chiquel. Max antsana' ca t'ajchi, hualam ne'ets quin yajna' ani ne'ets ca tithebe abal ti tomolnal. ²¹Yab ca bina' ta ba' quit atan c'al jahua' yab alhua', tocat ca bina' ta ba' ca t'aja' jahua' alhua' ani antsana' ta ca ata' jahua' yab alhua'.

13 Patal an inicchic in cua'al in uchbil quim putu c'al in abatnaxtal an oc'lecchic, cum c'al a Dios u bijiyabchic ani u punuhuabchic. ²Jitats quin tomolna' i oc'lec pel i tomolnax c'al im pumbil a Dios, ani ne'ets ca jolbiyat ani ne'ets ca yajchiquiyat. ³Jitats quin t'aja' alhua' yab ne'ets quin ts'ejna' an oc'lec, ani jitats quin t'aja' yab alhua' jats ojni' ne'ets quin ts'ejna'. Max tata' a t'ajal alhua' yab ne'ets ca ts'ejna', cum ne'ets quit tsu'tat tit alhua' inic. ⁴A Dios im punuhual i oc'lec abal ti tolmiy. Expith ca ts'ejna' an oc'lec max a

t'ajal jahua' yab alhua', cum ne'ets ti bina' quit yajchiquiyat. Cum pithnene in t'ojlabil c'al a Dios pel in uchbil an oc'lec quin yajchiquiy jitats quin t'aja' jahua' yab alhua'.

⁵Jaxtam tim fatal an inicchic pel in uchbil quim putu c'al in abatnaxtal an oc'lecchic. Max quim putuchic yab ne'ets ca yajchiquiyat, ani yab ne'ets quin ats'a' jolbith tin ichich. ⁶Cum u pithnal an oc'lecchic in t'ojlabil c'al a Dios ani jats in t'ojnalchic, jaxtam tata'chic a binal i jalgixtalab tumin.

⁷Jant'inits tin tomnal ca jalbinchat an tumin, antsana' ta ca jalbinchat tim fatal an oc'lecchic. Jant'inits ti bijithits quim bats'u an jalgixtalab tumin, antsana' ta ca jalbinchat. Jaye ca c'ac'na an oc'lecchic jant'inits tin tomnal ca c'ac'na. ⁸Yab ca q'uibchi i c'anithomtalab c'al jita'. Ca c'anitha' an inicchic, cum jats a uchbil jun c'al xi jun. Max chubax a c'anithal a at inic, tam ojni' ne'ets ca t'ajchi jahua' ti uchal an ts'ejcath cau binath c'al a Moisés ca t'ajchi. ⁹Ti uchal yab quit inicbejin ani yab quit uxumbejin. Yab ca tsemtha' a at inic. Yab quit cue'en. Yab ca q'uet'ach othanchi a at inic. Yab ca c'a'inch'i jahua' pel in c'al pil i inic. Tim fatal an uchbixtalab ti al an ts'ejcath cau binath c'al a Moisés c'uajat mac'uchithits c'al juncs i uchbixtalab, jats ca c'anitha' fatal a at inic jant'in'i ta c'anithal ta ba'. ¹⁰Max chubax a c'anithal a at inic yab ne'ets ca t'ajchi quithab. Max it c'anithom ne'ets ca tala' t'aja' jahua' in ulal an ts'ejcath cau binath c'al a Moisés.

¹¹Cu xe'tsin dej ts'ejcacath, yab cu xe'tsin ejtil max huayamath. Matam ti belamalits a Cristo ani mati xohue' u dej c'unelits a q'uicha ca chich a Cristo tucu jum putat jec'ontha'. ¹²Xohue' hue'its ne'ets ca taley an q'uij q'uicha ejtil max u dej atnalits an acal, ani hue'its ne'ets ca chich a Cristo ejtil max ca chuthey i it q'uicha. Jaxtam yabats in tomnal qui t'aja' jahua' i t'ajamal tam tu xe'etsac al an yic'uax. Cu xe'tsin al an tajax cum tats tu lo'onchamalits a Cristo cu xe'tsin. ¹³Qui t'aja' jahua' tequeth, cum antsana' in tomnal quin t'aja' axi lo'onchithits c'al an tajax. Yab cu uts'alin. Yab cu xe'tsin al i quithab ajib. Yab cu uxumbejin ani yab cu inicbejin. Yab qui t'aja' tu at'ax. Yab cu pejéxin ani yab cu pa'ixnáxin. ¹⁴Qui jila' an Ajatic Jesucristo tucu ichichliy ejtil jaja' ti ichichlith, ani yab qui hualca' ti ba' qui t'aja' jahua' in le' i hualbith t'ajtal ey.

Yab ca jolbixin axi ebchalab c'al a Cristo

14 Ca bats'u i ebchalab axi palulul im belal an Ajatic, ani yab ca hueutsixnanchi in tsalap. ²Tin tsalap axi jun i ebchalab alhua' max quin c'apu patal jahuaquits tam c'apnel, ani axi junaque alhua' max expith quin c'apu an lab ts'ojo. ³Ax in c'apal patal an c'apnel jahua' hua'ats yab quim pojca' ax in c'apal expith an lab ts'ojo, ani axi yab in c'apal patal an c'apnel yab quin jolbiy ax in c'apal patal jahua' hua'ats. Quin exla'chic abal a Dios im bats'umalchic axi tsablom tin tsacamil. ⁴Yab a cuenta ca jolbiy

in t'ojnalil q'ue'at i inic, expith an amu in exal max quin jolbiy o max i. Axi pel in t'ojnalil an Ajatic ojni' ne'ets quim putu c'al in uchbil cum tolmiyab c'al an Ajatic.

⁵Hua'ats i ebchalabchic ax im poc'oth tsalpanchal a q'uicha, jun a q'uicha dej exbath ani axi jun iba. Hua'ats jaye ax in tsalpanchal abal jununul in exbath patal a q'uichachic. Tin cuenta in exbath a q'uicha ti junchic ti junchic an ebchalab quin dej t'ayat co'oy in cuete' tsalap. ⁶Ax im poc'oth tsalpanchal in exbath a q'uicha in le' quin c'ac'na' an Ajatic ani ax in tsalpanchal jununul in exbath patal a q'uicha jaye in le' quin c'ac'na' an Ajatic. Aniye jaye tin cuenta an c'apnel. Ax in tsalpayal abal alhua' max quin c'apu patal jahuaquits tam c'apnel, antsana' in le' quin c'ac'na' an Ajatic. Ax in tsalpayal abal yab alhua' max quin c'apu patal jahuaquits tam c'apnel, u pabil cum antsana' in le' quin c'ac'na' an Ajatic. Xi tsablom im binal i c'ac'namal yan c'al a Dios.

⁷Huahua' yab u ejat abal qui t'aja' i cuete' le'nomtal, ani yab ne'ets cu tsemets expith max qui le'na' cu tsemets. ⁸U ejat abal qui t'ajchi in culbetal an Ajatic, ani ne'ets cu tsemets expith tam pel in culbetal an Ajatic. ⁹Jats ti tsemets ani ejtha an Ajatic abal tucu abatna', max u ejat o max u tsemene.

¹⁰Yab a uchbil tata' ca jolbiy a ebchal c'al a Cristo, ani yab in tomnal ca pojca'. A Cristo jats an ts'ejcom ani patal huahua' talbel ne'ets cu c'uajiy tin tamet abal jaja' tucu ts'ejca'.

11 Antsana' in ulal a Dios al an T'ocat Thuchlab:

In ejat abal ets'ey ani lej chubax patal an inicchic ne'ets quin tuthu in c'ualal tu tamet.

Patal ne'ets quin olna' c'al in at inic abal nana' in chubax Dios.

12 Ti junchic ti junchic huahua' talbel ne'ets qui bina' i cuenta c'al a Dios jahua' i t'ajamal.

**Yab qui t'apchi in tsalap
i ebchal c'al a Cristo**

13 Max i jolbiyamalits i ebchal c'al a Cristo yabats qui jolbiy. Expith qui lej punu ti ichich yab qui t'aja' jant'o c'al ta ca t'apchin in tsalap ani c'al ta ca ijca al i hualabtalab.

14 Nana' tim belom c'al an Ajatic Jesús u lej tso'obits abal yab hua'ats jant'o tam c'apnel axi yab alhua' ca c'apat, bel max jita' quin tsalpay abal hua'ats i c'apnel yab alhua' ca c'apat, tam in tomnal yab quin c'apu. **15** Max a t'apchal in tsalap a ebchal c'al a Cristo c'al jahua' a c'apal, yab a c'anithal. Aba ma ca le'na' ca c'apu i ca c'apu, abal i ca q'uibey a ebchal axi calchiyamejits c'al a Cristo ti al an cruz abal yab ca q'uibey. **16** Max a t'ajal jahua' a tsalpayal alhua' ca t'aja', ani max a ebchal in tsalpayal yab alhua' jahua' a t'ajal, yabats ca t'aja' abal i quin ulu yab alhua' jahua' a t'ajal.

17 Huahua' axi ne'ets cu otsits ti eb jun tin t'ajal a Dios ti lej Ts'ale i tso'obits abal yab lej exbath an c'apnel ani an uts'nel. Jahua' lej exbath jats qui t'aja' jahua' bolith c'al in tsap an Espíritu Santo. Jaye c'al in tsap jaja' lej exbath cu c'ujalelen jun ejet ani cu junax

culbe. **18** Max chubax antsana' ti t'ajal, tamna' i lej chubax c'ac'nal a Cristo ani u culbel a Dios c'al huahua'. Ani ne'ets cu tsu'tat tu alhua' c'al i at inic.

19 Qui luba' qui t'aja' hualim jahua' alhua' jun c'al xi jun abal cu tolmixin cu c'ujalelen jun ejet ani cu tolmixin qui más tsapna' a Dios. **20** Max tin ebal jahua' a c'apal ne'ets ca otnanchi jahua' a Dios in t'aychamal tin ichich a ebchal, yab ca c'apu. Chubax alhua' ca c'apat patal an c'apnel, tocat yab alhua' ca c'apu jahua' c'al ca ijca al i hualabtalab a ebchal. **21** Yab in tomnal ca c'apu i t'u'lec ani ca uts'a' i vino max tam ca c'apu a t'apchal in tsalap a ebchal. Ni jant'o yab ca t'aja' c'al ca ijca a ebchal al i hualabtalab o c'al ca palume más im belomtal. **22** Max ta lej cuete' ichich a tsalpayal abal alhua' jahua' a t'ajal expith tata' ca cuete' exla' ani a Dios jaye quin exla'. Max chubax alhua' jahua' a t'ajal, tam ne'ets quit culbe c'al jahua' a t'ajal, ani yab ne'ets ca uts'a' jolbith ta ichich. **23** Max a c'apal jant'o ani a tsalpayal hualam yab alhua' ca c'apat, jolbith ta ichich ne'ets ca uts'a'. Pel i hualabtalab jahuaquitsq'ui ca t'aja' max ta lej cuete' ichich ca tsalpay hualam yab alhua' jant'o a t'ajal.

Qui t'aja' jahua' in culbetnal i at inic

15 Max i lej tsapic belal a Cristo i cua'al i uchbil qui tolmiy an ebchalabchic axi palulul im belal, ani yab expith qui t'aja' i cuete' culbeta. **2** Qui luba' qui t'aja' jaye jahua' in culbetnal i at

inic, max c'al ca tolminchat ani c'al quin más bela' a Cristo. ³A Cristo ni jayq'ui' yab in t'aja' in cuete' culbetal. In hualba' tim ba' ani quithab cahuiliyamath c'al axi tomolnaxchic c'al a Dios jant'ini' ti thuchathits ti al an T'ocat Thuchlab t'ajchinene. ⁴Ma tam ti biyal patal jahua' thuchath ti al an T'ocat Thuchlab jats abal huahua' qui exobna'. Jats an cau ax tu tolmiyalchic qui cuxuy jahua' yajchic ani tu culbethanchal i ichich. C'al i ichich cuxuth ani culbel i aychal a Dios tucu t'ajchiye jant'initis im bijith ulumalits ne'ets tucu t'ajchi. ⁵Pel a Dios ax tu tolmiyal qui cuxuy an yajchictalab ani tu culbethanchal i ichich. U lej le' abal jaja' ti tolmiyachic quit c'uaajelen jun ejet jun c'al xi jun jant'ini' ti c'uaajlenenec jun ejet a Cristo Jesús c'al an inicchic. ⁶Max antsana' ta ca t'aja'chic ne'ets ca ejtou ca junax puhuethanchi im bij a Dios in Tata i Ajatic Jesucristo.

Olnanchat an alhua' cau axi yab Israelchic

⁷Jant'ini' a Cristo tu bats'umalits huahua' c'al i culbetalab, antsana' quit bats'c'úxin jun c'al xi jun c'al i culbetalab. Tam ojni' ne'ets ca lej puhuethanchat im bij a Dios. ⁸Nan tu uchalchic abal chich a Cristo quin tolmiy an Israelchic. Tam ti chichits, tam ti putnenequits am bijchith cau axi uchnenec am biyal Israelchic c'al a Dios abal ne'ets ca chich c'al jaja'chic. Cum chichits, jats ti tejhua'mejits a Dios abal chubax im putuhual c'al patal jahua' im bijchith ulal. ⁹Cum chichits

a Cristo, jaye axi yab Israelchic in exlalchic abal lej yajnanchix a Dios, ani jaxtam jaja'chic jaye quim puhuethanchi im bij a Dios. In ulal an T'ocat Thuchlab:

Nan ne'ets tu puhuethanchi a bij
Dios c'al axi yab Israelchic.
Ne'ets tu ajatnanchi a bij c'al
jaja'chic.

¹⁰Aniye jaye in ulal an T'ocat Thuchlab:

Quit junax culbe axi yab it
Israelchic c'al axi pelchic in
c'al a Dios.

¹¹Thuchath jaye antse':

Patal axi yab Israelchic quim
puhuethanchi im bij a Dios.
Tim patal an inicchic quin olna'
abal pel jaja' ja'its a Dios lej
pulic.

¹²Thuchath jaye c'al in caulomejil a Dios Isaias i cau jun tu olnab a Cristo:

Ne'ets ca hua'tsin jaja' axi
puthlab c'al a Isaí.
Jats ne'ets quin t'aja' ti abatnom
c'al axi yab Israelchic.
Ne'ets quin co'oy jaja'chic i
aychixtalab tin ichich abal
ne'ets ca jec'ontha c'al jaja'.

¹³Ja'its a Dios ax tu pithal i
aychixtalab ti ichich abal ne'ets
tucu t'ajchiye jant'initis im bijith
ulumalits ne'ets tucu t'ajchi. U
lej le' max jaja' ti jum putat
culbethanchichic ani ti lej jun
ejetbethanchi a ichich tin ebal
abal a belal a Dios. Ani an Espíritu
Santo ti tsapliy abal ca co'oy a
ichich lej jum putat co'oyab c'al i
aychixtalab.

¹⁴Ebchalabchic, nan u lej belal abal
it lej t'ayat canat ta ichich ca t'aja'

jahua' alhua'. A lej exbayalchic an cau ani a huit'al tit ts'alabchix jun c'al xi jun.¹⁵ Bel c'al i lej inictalab tu ichich nan tu thuchanchal axe' xi u abal yab ca uc'chiy chic an chubaxtalab. C'al in alhua' inictal a Dios jaja' tim punubchi abal nan tu thuchanchi tata'chic.¹⁶ Tim bijiy a Dios tin t'ojojalil a Jesucristo abal cu t'ojon c'al tata'chic axi yab it Israel. U uchbil nan tu olnanchichic an alhua' cau. U lej le'ac max ca bina' ta ba'chic c'al a Dios ejtil i ts'acchixtalab c'al ca culbe a Dios. Antsana' axi yab it Israel ca bina' ta ba' c'al a ichich t'oquethanchithits c'al an Espíritu Santo.

¹⁷ In culbel cum in junax t'ojojalil c'al a Cristo Jesús tin t'ojojalil a Dios. ¹⁸ Ne'ets tu olchichic expith jant'ini a Cristo tin eyenthanchamal u cahuinalt ani u t'ajbil abal axi yab Israelchic jaye quin t'aja' jahua' in le' a Dios. ¹⁹ Tin tsapliyamal an Espíritu Santo abal cu t'aja' i labith t'ajbilab ti tsu'bixtalab ma ti Jerusalén ani ma ti Ilírico ani abal ju'tamq'ui u tala' olnanchi i inicchic an alhua' cau tin cuenta a Cristo. ²⁰ U expinchi cu olna' an alhua' cau jun ti yabaye olname im bij a Cristo, cum yab u le' quin t'ojon jun tin ts'i'quiyalits q'ue'at i olnom. ²¹ Antsana' u tolmiy ca putun nixe' xi cau axi thuchath ti al an T'ocat Thuchlab tin cuenta im bij a Cristo antse':

Jita'chic yabaye olnanchame im
bij ne'ets ca olnanchise.

Jita'chic yabaye olchinene
ne'ets quin ejtinchiye in ey.

In tsalpayal a Pablo ca c'ale ti Roma

²² Cum in lej t'ojojlilith cu olna'
an alhua' cau, jaxtam yabaye u

ejtohuamal quin c'ale ti Roma abal tu tsa'biy chic.²³ Ma xohue'its u tala' an t'ojojalib al axe' xi cuenchalchic. Lej ohuatits u lej le' tu tsa'biy, ani ma xohue' in jolc'anenequits.²⁴ Tam in ne'etse tihua' ti España, tam ne'ets quim peley tu tsa'biy chic jaye. Cu t'ilmatlits ani cu tsaplíxinitis, ani tiq'uele quin c'ale ti España. U le'ac max tata'chic tiquin tolminchi hue' c'al jant'oquitsq'ui cu yejenchi abal quin ulits ti España.²⁵ C'a'al in ne'ets ti Jerusalén cu jilchi i tolmixtalab an ebchalabchic axi tihua' c'uajat.²⁶ An ebchalabchic ti Macedonia ani axi ti Acaya in tamcuyamalits i tumin abal cu nenchis ani cu jilchi an ts'ejhualt ebchalabchic axi ti Jerusalén.²⁷ In tamcuyamalits c'al in culbetal an tolmixtalab tumin, ani jaye chubax pel in uchbil quin tolmiy an ts'ejhualt ebchalabchic. Axi ti Macedonia ani axi ti Acaya olchinene an alhua' cau c'al an ebchalabchic ax pel i Israelchic ti Jerusalén, ani cum antsana' olchinene an tolminchame axi yab pel i Israelchic tin cuenta in ejattal, in tomnal jaja'chic quin tolmiy axi Israelchic ani ebchalab c'al a Cristo ti Jerusalén tin cuenta i yejenchixtalab c'al in inictal.

²⁸ Tam cu nenchis ani cu jilchits an tolmixtalab tumin ti Jerusalén, tam ne'ets tu tsa'biy chic. Ne'ets quim peley c'al tata'chic, ani talbel quin c'ale ti España.²⁹ U lej tso'obits abal tam quin ulits c'al tata'chic a Dios ne'ets tucu c'athpich lablinchi, cum ne'ets tu t'iloxnanchi más im bij a Cristo.

³⁰ Nan tu lej punubchal ebchalabchic, abal ca lej luba'

tiquin conchinchi in tolmixtal a Dios c'al u t'ojojabil. Pel huahua' tu junax belom c'al i Ajatic Jesucristo ani u c'anitháx jun c'al xi jun, cum an Espíritu Santo tu pithamalits i c'anithomtalab ti lej ichich.³¹ Tiquin lej conchinchi a Dios abal yab quin othna tihua' ti Judea c'al axi yab im belalchic a Cristo. Jaye ca conchi a Dios abal an tolmixtalab tumin axi ne'ets cu jilchi an ebchalabchic ti Jerusalén ca bats'uhuat c'al i lej culbetalab.³² Jaye max pel in culbetal a Dios quin ulits c'al tata'chic c'al i culbetalab ani cu jela' u ichich c'al tata'chic.³³ U lej le' max a Dios ca c'uajiy c'al tata'chic. Ja'its jaja' ax tu jun ejetbethanchalchic i ichich. Amén.

An tsapnethomtalabchic

16 U le' tu olchi i cau tin cuenta jun i uxum im bij Febe. Pel i ebchalab c'al a Cristo ani jaye pel i punuth tolmix c'al an tamcunel ebchalab ti bichou Cencrea.² Ca bats'uchic jaja' c'al i culbetalab tim bij an Ajatic, cum antsana' in tomnal ca bats'uhuat axi ebchalabchic ani at belom c'al a Cristo. Ca tolminchi c'al jant'ots quin yejenchi, cum jaja' lej tolminchixin c'al yan i ebchalabchic. Nana' tin lej tolminchamalitsne.

³ Ca tsapnetha'chic a Priscila ani a Aquila, cum pel u at t'ojnal nana' tin t'ojojabil a Cristo Jesús.⁴ Hue'its max jaja'chic tsemthamejac abal tiquin jec'ontha', ani jaxtam u uchalchic lej c'ac'namat yan. Aniye jaye tu uchnal c'al patal an

tamcunel ebchalabchic axi yab Israel.⁵ Ca tsapnetha'chic jaye an ebchalabchic ax u tamcunal tin q'uima' a Priscila ani a Aquila. Ca tsapnetha' u c'an ja'ub Epeneto axi pel i oc'ox belom tihua' ti Acaya.⁶ Ca tsapnetha'chic a Maria ax in lej luba' ti tolminchichic.⁷ Ca tsapnetha'chic u at juntal xits'al Andrónico ani a Junias c'al tu junax huic'nenec ti jayq'ui' c'al nana' al an huic'axte'. U lej c'ac'nabchic tin abathualejilchic a Cristo. Jaja'chic im belamal a Cristo tam ti nana' yabaye u belamal.

⁸ Ca tsapnetha'chic a Amplias axi pel u c'an ja'ub c'al a Cristo.⁹ Ca tsapnetha'chic a Urbano axi junax t'ojnal c'al huahua' tin t'ojojabil a Cristo Jesús. Ca tsapnetha'chic jaye a Estaquis cum u lej c'anithal.¹⁰ Ca tsapnetha'chic a Apeles ax in lej tejhua'metha' abal in lej belal a Cristo, aba ani' in huat'amal yan i yajchictalab. Jaye ca tsapnetha'chic axi c'uajatchic tin q'uima' a Aristóbulo.¹¹ Ca tsapnetha'chic u at juntal xits'al Herodión ani axi tin q'uima' a Narciso, cum jaye im belalchic a Cristo.¹² Ca tsapnetha'chic a Trifena ani a Trifosa ax u t'ojnal jaye c'al an Ajatic. Ca tsapnetha'chic i c'an ebchal Pérsida axi lej t'ojnenec c'al an Ajatic.¹³ Ca tsapnetha'chic a Rufas axi lej c'ac'nab ti belom c'al an Ajatic. Ca tsapnetha'chic jaye in mim, cum in mim ejtil max pel u mimne.¹⁴ Ca tsapnetha'chic a Asincrito, ani a Flegonte, ani a Hermas, ani a Patrobas, ani a Hermes, ani an ebchalabchic axi c'uajat c'al jaja'chic.¹⁵ Ca

tsapnetha'chic a Filólogo ani a Julia, ani a Nereo ani in ebchal, ani a Olimpas ani patal an ebchalabchic axi c'uajat c'al jaja'chic im belal a Cristo.

16 Quit tsapnetháxin jun c'al xi jun c'al i lej c'anithomtalab. Ti tsapnethalchic patal an tamcunel ebchalabchic teje' ax im belal a Cristo.

17 Nan tu lej uchal ebchalabchic, yab quit ts'at'ey c'al ax in le' ti lehuáxliy ani ti t'apchi a tsalapchic. In tomolnal jaja'chic an exobchixtalab ax it exobchinenequits. **18** Yab in t'ajchalchic in culbetal i Ajatic Jesucristo, tocat in t'ajalchic in cuete' le'nomtal. C'al i cau axi palu ani ejtil max alabel in c'ambyialchic axi yab in tequeth exlalchic jahua' chubax alhua'.

19 C'al patal an inicchic it exlabchic abal a putuhual c'al in cahuinal a Dios, ani jats tin culbel. U lej le' abal quit lej junini' c'uajiythic c'al a ichich ca t'aja' jahua' alhua', ani yab ca t'aja' jahua' yab alhua'. **20** A Dios ne'ets ti tolminchichic ca jum putat ata' a Satanás. Jats a Dios ax tu jun ejetbethanchal i ichich. U lej le' abal i Ajatic Jesucristo ti lubach co'onchichic a ichich c'al in alhua' inical.

21 Ti tsapnethalchic a Timoteo u at t'oinal c'al nana'. Ti tsapnethalchic jaye a Lucio, ani a Jasón, ani a Sosipater axi pelchic u at juntal xits'al.

22 Nana'its in Tercio tin thuchcolil a Pablo ax tu

thuchanchalchic axe' xi u, ani tu tsapnethalchic tim bij an Ajatic.

23 Ti tsapnethalchic a Goyo ax in matiyal in atajil jun ti ca tamcun an ebchalabchic ani xohue' in coyomath tin q'uima'. Ti tsapnethalchic jaye a Erasto axi cuentalom c'al in tuminal am bichou. Ti tsapnethalchic jaye i ebchal Cuarto.

24 U lej le' abal ti lubach co'onchichic a ichich i Ajatic Jesucristo c'al in alhua' inical. Amén.

Qui puhuethanchi im bij a Dios

25 Qui puhuethanchi im bij a Dios. Ja'its jaja' ax in ejtohual ti tsapliythic abal ca junini' belchi an alhua' cau ax nan tu olnanchamalits ani an exobchixtalab jahua' nan tu exobchamalits tin cuenta a Jesucristo. Jats an alhua' cau axi tsincanchame an inicchic ma tam ti biyal, ani ma xo' a Dios in tejhua'methanchal. **26** Jats an alhua' cau axi thuchath ti al an T'ocat Thuchlab jant'ini' ti olna c'al in caulomejilchic a Dios. Jats an cau ax a Dios axi ejat abal ets'ey tu punubchal qui tso'oblinchi tim patal an inicchic abal ju'tamq'ui abal quim belchichic ani quim putuchic c'al jahua' in ulal an alhua' cau.

27 Hua'ats juncats a Dios in ey lej tsalpath. Jats qui puhuethanchi im bij ani jaye im bij a Jesucristo abal ets'ey. Amén.